


मां बैश्नो

पौराणिक नाटक / डोगरी



टी. आर. मगोत्रा 'सागर'

मां बैश्नो

(पौराणिक नाटक/डोगरी)

टी. आर. मगोत्रा 'सागर'

(एम.ए. (इतिहास), एल.एल.बी.,
शिरोमणि, पी.जी.जे.एम.सी.)

प्रकाशक

टी. आर. मगोत्रा प्रकाशन

कर्ण विहार, अप्पर ठडुर जम्मू-181123

मोबाइल : +919419105561

मां बैश्नो/1

मां बैश्नो

(पौराणिक नाटक/डोगरी)

टी. आर. मगोत्रा 'सागर'

(एम.ए. (इतिहास), एल.एल.बी.,

शिरोमणि, पी.जी.जे.एम.सी.)

प्रकाशक

टी. आर. मगोत्रा प्रकाशन

कर्ण विहार, अप्पर ठडुर जम्मू-181123

मोबाइल : +919419105561

मां बैश्नो/1

मां वैश्नो

(पौराणिक नाटक/डोगरी)

लेखक

टी. आर. मगोत्रा 'सागर'

MAA VAISHNO

(Puranak play in Dogri)

By

T.R. Magotra 'Saagar'

© अनुवाद, परतिष्टे प्रकाशन ते चित्रपट निर्माण

बगैरा दे सारे अधिकार लेखक कोल सुरक्खत न.

(बाहुरला चित्तर : श्वेतपद्मा मिश्र/Image of Vaishno Devi Goddess/

cover design by—Swetapadama Mishra, Orissa, India)

कताब	:	मां वैश्नो (पौराणिक नाटक/डोगरी)
लेखक	:	टी. आर. मगोत्रा 'सागर'
पैह्ला संस्करण	:	2021 ई.
कताबां	:	500 पैह्ले बारी
मुल्ल	:	500 रपेऽ
प्रकाशक	:	टी. आर. मगोत्रा प्रकाशन, कर्ण विहार, अप्पर ठट्टर, जम्मू- 181123 (जे. एंड के.)
मोबाइल	:	+919419105561



जिसदी भक्ति करदे होई
आपूँ ब्रह्मा जी इस जगत दे सिरजनकर्ता होए,
भगवान विष्णु पालनकर्ता होए,
ते भगवान शिव संहार करने आहले होए ;
जोगी-लोक जिसदा ध्यान करदे न,
ते तत्त्वार्थ जानने आहले मूल प्रकृति आखदे न,
सुर्ग ते मोक्ष (मोक्ष) प्रदान करने आहली
उस जग-जननी गी मेरा कोटि-कोटि प्रणाम ऐ।



देवी भक्त
'सागर'

इस लेखक दे होर प्रकाशन

1. कुंगले पत्तर खिड़दे फुल्ल : (कवता संग्रैह/डोगरी-1981)
2. पीड़ें दा बादशाह : (कवता संग्रैह/डोगरी-1985)
3. गजलमाला : (गजल संग्रैह/डोगरी-1996)
4. हिरख पटारू : (गजल संग्रैह/-डोगरी-2006)
5. गैं-गैं जिंदगी : (गजल संग्रैह/डोगरी-2011)
6. पुंछ-इतेहास दी नजरी च : (इतिहास/डोगरी-2018)
7. जम्मू पादशाही : (इतिहास/डोगरी-2020)
8. दिद्दा : (नाटक/हिंदी-2020)
9. हिरदेगत : (कवता संग्रैह/डोगरी-2020)
10. मां बैश्नो : (पौराणिक नाटक/डोगरी-2021)

मान-सम्मान/आकाशवाणी पुरस्कार

- बहुत बह गया रक्त अब : (हिंदी/प्रस्तुतकर्ता-1997)
- जीवन यात्रा का चौथा धाम : (हिंदी/लेखक ते प्रस्तुतकर्ता-1999)
- चश्मे-बुलबुल : (पहाड़ी/प्रस्तुतकर्ता-2003)
- अम्बेडकर फैलोशिप/साहित्य सम्मान : (1997 ते 2002)
- साहित्यश्री सम्मान : 2021 ई.

महाभारत की संस्कृत भाषा

(अथर्व-संहिता-प्रथमः सर्गः)	१-१००
(अथर्व-संहिता-द्वितीयः सर्गः)	१०१-२००
(अथर्व-संहिता-तृतीयः सर्गः)	२०१-३००
(अथर्व-संहिता-चतुर्थः सर्गः)	३०१-४००
(अथर्व-संहिता-पंचमः सर्गः)	४०१-५००
(अथर्व-संहिता-षष्ठः सर्गः)	५०१-६००
(अथर्व-संहिता-सप्तमः सर्गः)	६०१-७००
(अथर्व-संहिता-अष्टमः सर्गः)	७०१-८००
(अथर्व-संहिता-नवमः सर्गः)	८०१-९००
(अथर्व-संहिता-दशमः सर्गः)	९०१-१०००

महाभारत की संस्कृत भाषा-संग्रह

(अथर्व-संहिता-प्रथमः सर्गः)	१-१००
(अथर्व-संहिता-द्वितीयः सर्गः)	१०१-२००
(अथर्व-संहिता-तृतीयः सर्गः)	२०१-३००
(अथर्व-संहिता-चतुर्थः सर्गः)	३०१-४००
(अथर्व-संहिता-पंचमः सर्गः)	४०१-५००
(अथर्व-संहिता-षष्ठः सर्गः)	५०१-६००
(अथर्व-संहिता-सप्तमः सर्गः)	६०१-७००
(अथर्व-संहिता-अष्टमः सर्गः)	७०१-८००
(अथर्व-संहिता-नवमः सर्गः)	८०१-९००
(अथर्व-संहिता-दशमः सर्गः)	९०१-१०००

ब्योरा

- | | |
|--|-------|
| 1. अपने पासेआ | 9-10 |
| 2. मां बैश्नो देवी-संखेप इतेहास ते कथा | 11-21 |
| 3. स्रोत समगरी | 22-23 |
| 4. नाटक | 24-87 |
| (अंक-1/ 25-39, अंक-2/ 40-62, अंक-3/ 63-87) | |
| 5. भेंट | 88-89 |
| 6. लेखक दे होर प्रकाशन | 90 |

अपने पासेआ

जै माता दी!

नाटक गद्य दा ओह् कथात्मक रूप ऐ, जिसी अभिनय, नृत्य, संगीत, संवाद बगैरा दे स्हारै ते पातरें राहें रंगमंच पर प्रस्तुत कीता जाई सकदा ऐ। इस पौराणिक नाटक च में इ'नें गुणें गी गै प्रस्तुत करने दा प्रयास कीते दा ऐ।

एह् पौराणिक नाटक में 1980 ई. (शुरू दे द्हाके) च लिखेआ हा। लिखने परैंत इस नाटक गी में द'ऊं आदरजोग नाटक निर्देशकें गी पढ़ने लेई बारी-बारी दिता हा, पर, मतै चिरै तगर उ'नें अपनी कोई प्रतिक्रिया निं दित्ती तां प्रतिलिपि उ'दे कोला बापस लेई लैती। दोऐ बड़े मसरूफ व्यक्ति न, शैद इ'नें गी पढ़ने दा समां गै निं लगा होना, जेकर पढ़े दा हुंदा तां चंगी जां माड़ी; किश ना किश अपनी प्रतिक्रिया जरूर दिंदे।

उ'आं श्री कुमार अ. भारती होर 2018 ई. दे खीरै च मेरे कोल आए ते इस नाटक दी प्रति मेरे कोला मंगी बो में उस बेल्लै इसदी प्रति उ'नेंगी देई निं सकेआ। भारती हुंदी गल्लबात थमां एह् गल्ल सपष्ट होई गेई जे उ'नें एह् नाटक पढ़े दा हा ते उ'नें अपनी किश प्रतिक्रिया बी व्यक्त कीती। इ'न्ना समां बीतने दै बाद बी उ'नें गी इस नाटक बारै चेता हा, इस लेई मिगी किश खुशी बी मसूस होई।

जिसलै बी में इस पांडुलिपि गी दिखदा जां हत्थें छूंहदा तां दिलै च अजीब इक रड़क-जन मसूस होंदी तां में इस नाटक दी समीक्षा करने बारै सोची। ग्यान बाढ़े लेई किश होर ग्रैंथें/पुस्तकें दा अध्ययन बी शुरू कीता। इस नाटक च किश सुधार करिऐ मजूदा स्थिती च लेई आंहदा।

देवी बारै सैंकड़ां ग्रेंथ लखोए दे न। इस नाटक लेखन लेई मुख समगरी मार्कण्डेयपुराण, दुर्गासप्तशती ते वराहपुराण दे किश ध्याएं थमां लैती गेदी ऐ। इतेहास ते कथा दी पबितरता गी बरकरार रखदे होई किश कल्पना दा सहारा बी लेदा ऐ। डोगरी च नाएं दा उच्चारण ते लिखत रूप बेशक बक्खरा-बक्खरा ऐ, पर, में इक दो नाएं गी छोड़िए एह् नांऽ उस्सै चाल्ली लिखे न जिस चाल्ली ग्रेंथें च लखोए दे न।

किश अंश (पैह्ले अंक/द्रिश्श च) डोगरी कारक थमां बी शामिल कीते गेदे न। तुं'दी प्रतिक्रिया मेरा हौंसला बधाने आस्तै मददगार होई सकदी ऐ। तुं'दा सारें दा सुआगत ऐ।

जै माता दी॥

देवी भक्त,
'सागर'

पैहली जनवरी-2021

मां बैश्नो-संखेप इतेहास ते कथा

- साढ़े देश च प्राचीनकाल थमां गै शक्ति पूजा दा प्रचलन रेहा ऐ। प्रागैतेहासक काल थमां लेइऐ अज्जै तगर हिंदू धर्म ईशवर गी माता ते पिता दे रूप च उपासना करदा आया ऐ। डॉ. बी के शास्त्री होरें राधाकृष्णन् (ईस्टर्न रिलिजस एंड वेस्टर्न थाट : सफा-307) हुंदै हवाले कनै लिखे दा ऐ जे एह संभावना ऐ जे देवी पूजा सिंधू-घाटी दे बकास थमां पैहलें गै प्रचलत ही।
- देवी दी जि'न्नी बी शक्तियां मन्नी गेदियां न, उं'दा सब दा मूल महालक्ष्मी ऐ। इऐ पराशक्ति श्रेष्ट ऐ। एह देवी सुगें च सुर्गलक्ष्मी, राजें कोल राजलक्ष्मी, पुरशें दै घर गृहलक्ष्मी, बपारीजनें दै घर धनलक्ष्मी ते युद्ध च बजेता कोल विजयलक्ष्मी दे रूपै च बास करदी ऐ। देवी भागवत दा एह परम सिद्धांत ऐ जे ईश्वर दा जो सरूप ऐ उऐ शक्ति दा बी ऐ। ईश्वर दी प्राप्ति दा उपाऽ बी शक्ति ऐ।
- दुर्गासप्तशती (श्रीदुर्गा अष्टोत्तर शतनाम स्तोत्रम्) च परम साध्वी दुर्गा गी मन्नेआ गेदा ऐ। इक्कै देवी गी दुर्गा, बैश्नो ते लक्ष्मी दे लावा होर केई संज्ञाएं कनै संबोधत कीता गेदा ऐ। भगवान विष्णु दी माया होने दै कारण इस देवी गी वैष्णवी; बैश्नो दी संज्ञा दिती गेदी ऐ। लक्ष्मी देवी कमल दे आसन उप्पर बराजमान ऐ ते हत्थें च बी कमल धारण कीते दे न। डुग्गर भुमि च शतश्रृंग फ्हाड़ै दे त्रिकूट टीसी दी गुफा च मां भगवती बैश्नो नांऽ कनै विद्यमान ऐ। मार्कण्डेयपुराण, दुर्गासप्तशती ते वराहपुराण च बी इस्सै देवी गी वैष्णवी; बैश्नो दी संज्ञा दिती गेदी ऐ॥

- मां बैश्नो दा संखेप इतेहास ते कथा इस चाल्ली ऐ :-

दनू असुर दे रंभ ते करंभ, जगत प्रसिद्ध दो पुत्तर हे। दोऐ संतानहीन हे ते दोऐ संतान प्राप्ती लेई बड़ी करठन तपस्या करन लगे। इ'नें दौनें दैत्यलोकें दी स्थिति दा पता लगाने पर इंद्र देव आपूं चलिऐ पचनद पुज्जे ते करम्भ दी तपस्या भंग करिऐ उसी मारी दिता। रम्भ दी तपस्या थमां प्रसन्न होइऐ अग्निदेव प्रगट होऐ ते उसी इच्छानुसार 'वर' मंगने लेई गलाया। रम्भ नै इच्छा जाहर कीती जे ओह त्रैलोकी पर जित प्राप्त करने आह्ला पुत्तर चांहदा ऐ। अग्निदेव ने गलाया 'ठीक ऐ तेरी मनोकामना पूरी होग'। अग्निदेव ने इ'ब्बी गलाया जे 'जिस सुंदरी पर तेरा मन और उस्सै दे गर्भ थमां म्हान बीर ते पराक्रमी पुत्तर दी तुगी प्राप्ती होग'।

- दूऐ पाससै ग्यानी रिशी सुपाश्वर्य मंदराचल फ्हाड़ै पर तपस्या करै दे हे। इक दिन विप्रचित्ति नांऽ दे राखश दी महिश्मती नांऽ दी पुत्तरी अपनी स्हेलड़ियें कन्ने उस फ्हाड़ै पर सैर करने गी आई। उस थाहरै दा वातावरण, शांत, एकांत ते बड़ा गै रमणीक दिक्खिऐ उस उत्थें गै रौहनें दी सोची। राखश कन्या होने दै नातै उसगी हर प्रकार दी छल-विद्या औंदी ही। उसनै इक महिशी (मैह/भैंस) दा रूप धारण करिऐ सुपाश्वर्य रिशी गी डराना-धमकाना शुरू करी दिता।
- रिशी ने अपनी ग्यान द्रिष्टी कन्ने 'मैही' दा रूप धारने आहली उस महिशी गी पनछानी लैता। राखश कन्या दे सलूक थमां दुखी होइऐ रिशी ने उसी मैह (भैंस) गै रौहने दा श्राप देई दिता। अपने कीते दे बुरे बरताऽ लेई महिशी रिशी थमां माफी मंगन लगी ते दिते दे श्राप थमां मुक्त होने दे उपाऽ पुच्छन लगी। महिशी दा पश्तावा दिक्खिऐ रिशी गी तरस आया ते उसनै महिश्मती गी गलाया जे ओह इक पुत्तर गी जनम देइऐ इस योनि थमां श्राप मुक्त होई जाग। राजकुमारी महिशी उस्सै रूप च गै घुम्मन-फिरन लगी। उद्धर रम्भ

अपनै घर पुज्जा। राखश होने दै नातै ओहदे च पशुभाव ते है गै हा
 इक दिन ओहदी नजर उस महिशी पर पेई। महिशी बी अपनी जुआनी
 दे नशे च मदमस्त ही। रम्भ ते महिशी दे मलाप थमां जो पुत्तर पैदा
 होआ उसदा नांऽ महिशासुर रक्खेआ गेआ।

- महिशासुर गी जनम देइऐ राजकुमारी महिशी (मैह) दी योनि थमां
 मुक्त होई गेई। महिशासुर नै अति करठन तप करिऐ ब्रह्मा जी कोला
 कुसै बी पुरशै दे हत्था नेई मरने दा वरदान प्राप्त कीते दा हा। ब्रह्मा
 जी ने ओहदी तपस्या थमां प्रस्सन होइऐ 'वर' दित्ता जे ओह नारी
 दे सवाए कुसै बी मरदै दे हत्था नेई मरग।
- वराहपुराण (ध्याऽ-95) च बर्णन इस चाल्ली ऐ : स्रिष्टी दे शुरू च
 सुपार्श्व नांऽ दे इक बड़े ग्यानी रिशी हे। उसदा जनम सरस्वती नदी
 दे तटवर्ती देश च होए दा हा। इक सिंधुद्वीप नांऽ दे मित्तर बी उं'दै
 गै बरोबर तेजस्वी ते प्रतापी हे। महिश्मती नांऽ दी पुरी च उस करठन
 तपस्या शुरू करी दित्ती। विप्रचित्ति देत्य दी महिश्मती नांऽ दी पुत्तरी
 इक बारी अपनी स्हेलडियें कनै घूमदे-फिरदे उस प्हाड़ें पर आई।
 उस तपोवन दे स्वामी इक रिशी हे। जिसलै विप्रचित्ति कुमारी ने उसी
 दिक्खी लैता तां उस देत्य कन्या ने उस रिशी गी सताने दी सोची।
 उस दानव कन्या ने अपना रूप इक मैह दा धारण करी लैता। ओह
 राखशी अपनी स्हेलडियें कनै सुपार्श्व रिशी कोल पुज्जी गेई। उस
 रिशी गी डराना-धमकाना शुरू करी दित्ता। उसदा रूप अति आकर्शक
 हा। ग्यान-नेत्र कनै रिशी ने जानी लैता जे एह राखशी कन्या ऐ। रिशी
 ने गुस्से च आइऐ उसी श्राप देई दित्ता जे उसी सौ बरें लेई इसै मैह
 (भैस) दी योनि च गै रौहने पौग। जिसलै राखश कन्या गी गलती
 दा एहसास होआ तां रिशी थमां माफी मंगन लगी। महिश्मती दी
 प्रार्थना उप्पर दयालु रिशी ने उसी गलाया जे इक पुत्तर गी जनम देइऐ
 ओह इस योनि थमां मुक्त होई जाग। इसदै बाद महिशी नर्मदा नदी

दे इक पत्तन पर गई जित्थें सिंधुद्वीप रिशी तपस्या करै दे हे। उसै थां किश चिर पैहलें इक देत्य कन्या इंदुमती उस जल च निवस्त्र होइऐ स्नान करै दी ही। उसदा रूप बड़ा सन्हाकड़ा हा। उस पर द्रिस्टी पोंदे गै मुनि दा रेत शिलाखंड पर स्खलत होई गेआ जो इक नाले चे बगदे होई नर्मदा नदी च आया। महिश्मती दी द्रिस्टी उस पर पेई। उस रेत गी उस पी लेता। उस थमां उसगी पुत्तर प्राप्ति होई। ओह बड़ा पराक्रमी, प्रतापी ते बुद्धिमान होआ। बाद च ओह महिशासुर नांs कनै प्रसिद्ध होआ।

- बड़डा होने पर महिशासुर अपने बब्बै दे तप ते बरदान दे कारण महाशक्तिशाली ते महापराक्रमी होआ। बड़्डें-बड़्डें देवतें/राखशें ओहदी सत्ता स्वीकार करी लेई। राखश देवतें ते लुकाई गी सतान लगे। अपनी छल-विद्या कनै राखश केई रूप धारी लेंदे। उंदे अत्याचार दिक्खिए धरती बी व्याकुल होई गई। खीर देवतें ते राखशें बशकार बड़ा भारी युद्ध होआ। युद्ध च हारी जाने परैंत सारे देवते सुर्ग छोड़ियै इद्धर-उद्धर नट्टी गे। खीर सारे देवता किट्टे होइऐ भगवान विष्णु ते शिव जी कोल गे।
- भगवान विष्णु ने अपनी ग्यान द्रिस्टी नै जानी लैता जे महिशासुर दी मौत सिर्फ इक कन्या दे हत्थै गै संभव ऐ। उ'नें सारें देवतें गी गलाया जे सारें देवतें दे तेज कनै इक दि'ब्ब देवी प्रगट होई जा तां ओह इस दुष्ट गी मारी सकदी ऐ। विष्णु जी दे इस बचार दा सारें देवतें सुआगत कीता। उसै बेल्लै ब्रह्मा जी दे मुख थमां इक तेज प्रगट होआ। शिव जी, इंद्र जी ते सारे देवतें दे शरीर थमां बक्ख-बक्ख तेज पुंज निकली-निकली इक थां किट्टे होया। तेज पुंज थमां जबरदस्त रोशनी प्रगट होई ते ओह तेज पुंज अति सुंदर कन्या रूप च परिवर्तित होई गेआ। देवतें दे तेज पुंज कनै प्रगट होई दी देवी गी दिक्खिए सारे देवते बड़े खुश होए।

- ग्रँथें च आक्खी गेदी इस गल्लै दा बर्णन डोगरी कारक च इस चाल्ली मजूद ऐ :

शक्ति कौन देव ने पैदा कीनी, कौन देव नै मानी।

शक्ति ओंकार ने पैदा कीनी शिव-शंकर नै मानी ॥

- देवतें देवी अगँ महिशासुर दे अत्याचार दा बर्णन कीता। सारें देवतें देवी गी केई दि'ब्ब अस्त्र-शस्त्र प्रदान कीते। सारें देवी अगँ पूरे संसार दी ते अपनी रक्खेआ लेई प्रार्थना कीती।
- देवी ने देवतें गी हौंसला रक्खने लेई गलाया ते आपूं शतश्रृंग पर्वत पर आई गई। जिस समें बैश्नो (दुर्गा) इस स्थान पर तपस्या च लीन ही उ'नें दिनें गै देवतागण महिशासुर नां दे असुर थमां पीड़त होए। इस फ्हाड़ै पर अक्सर महिशासुर दा औना-जाना लग्गा रौहदा हा।
- जिसलै महिशासुर दा दूत माता बैश्नो कोल ब्याह दा प्रस्ताव लेइऐ शतश्रृंग फ्हाड़ै पर पुज्जा तां देवी ने उसी गलाया 'मंत्रीवर सम्पूर्ण राखशें दा बध करने लेई गै ते अ'ऊं इत्थें प्रगट होई आं'। देवी ने उ'नें गै इ'ब्बी गलाया जे अपने महिशासुर गी जाइऐ आक्खो जे इस कोला पैहलें जे मेरे बाण उसदे शरीरै गी बेधी देन, पृथ्वी छोड़िऐ पताललोक चली जाने च गै तुं'दी सारें दी भलाई ऐ। देवी ने उ'नें गी गलाया जे ओह महिशासुर गी युद्ध करनें लेई गलान। देवतें ते राखशें बशकार घमासान युद्ध होआ। केई राखशें समेत महिशासुर बैश्नो देवी; दुर्गा देवी दे हत्थें मारेआ गोआ। महिशासुर दी मौत दिक्खिऐ सारे देवता खुश होए ते देवी दा गुणगान करन लगे।
- स्कंदपुराण (अरुणाचल-माहात्म्य खंड) च बी दुर्गा देवी दे हत्था शुम्भ, निशुम्भ ते महिशासुर दे बध दा बर्णन मजूद ऐ। पर, किश कताबें च भैरव/भैरों दा जिकर बी होए दा ऐ।
- डॉ. बी. के. शास्त्री होरें अपनी कताब च इस दा स्पष्टीकरण इस

चाल्ली दिते दा ऐ जे भैरों घाटी दा अर्थ ऐ-भयानक घाटी। शतश्रृंग
 प्हाड़ै दा एह् भूभाग प्राकृतक द्रिष्टी कन्नै अति भयानक हा ते
 महावली महिशासुर इससै घाटी पर मारेआ गेआ हा ते इससै कारण
 एह् स्थान भैरव घाटी नांऽ कन्नै प्रसिद्ध होई गेआ ते महिशासुर गी
 इस लेई भैरव बी आक्खेआ गेदा ऐ।

- हिंदी भाषा दा 'भैरव' गै डोगरी च 'भैरों' बनी जंदा ऐ कि जे खीर
 च 'व' अक्खर अक्सर 'ओ/औ' च परिवर्तत होई जंदा ऐ। प्रश्न उठदा
 ऐ जे भैरों कु'न हा राजा या जोगी ? जेकर, राजा हा तां केढ़ै समें
 ते केहड़े देसै दा ? इतेहास जां शास्त्रें च उसदा जिकर की नेई औंदा ?
- मार्कण्डेय पुराण/दुर्गासप्तशती/वराहपुराण च इससै देवी गी वैष्णवी;
 बैश्नो दी संज्ञा दित्ती गेदी ऐ। श्रीदुर्गासप्तशती च दुर्गा गी परम साध्वी
 भगवती मन्नेआ गेदा ऐ। श्रीदुर्गाष्टोत्तर शतनाम स्तोत्रम् (श्लोक 1-
 15) च देवी दा 108-एं संज्ञाएं नै बर्णन कीता गेदा ऐ। इ'नें नांएं
 च 'वैष्णवी' दा नांऽ (श्लोक-8) बी दित्ते दा ऐ। त्रिगुणमयी
 महालक्ष्मी दे तामसी बगैरा त्रै सरूप दस्से गेदे न। देवी शर्वा, चंडिका,
 दुर्गा, भद्रा ते भगवती बगैरा केई नांएं कन्नै बी पुकारी जंदी ऐ।
- दुर्गासप्तशती च (देव्याः कवचम् /श्लोक-1-5) देवी दियां नौ
 मूर्तियां दस्सी गेदियां न जि'नें गी नवदुर्गा (नौदुर्गा) आक्खेआ गेदा
 ऐ। एह न :- 1. शैलपुत्तरी, 2. ब्रह्मचारिणी, 3. चंद्रघण्टा, 4. कूष्माण्डा,
 5. स्कंदमाता, 6. कात्यायनी, 7. कालरात्री 8. महागौरी, ते नौमीं दुर्गा
 दा नांऽ सिद्धिदात्री दित्ता गेदा ऐ। इ'नें गी पाप विनाशनी बी गलाया
 जंदा ऐ। जो बी देवेश्वरी दा चिंतन करदा ऐ देवी उसदी रक्खेआ
 करदी ऐ।
- बैश्नो देवी बाँरे केई ग्रँथ लखोए दे न। हर ग्रँथ च बक्खरे-बक्खरे
 प्रसंग मिलदे न। वैदिक सहित्य थमां पुराण साहित्य तगर ते पुराणें

थमां अज्जै तगर जो साहित्य जां लोकगीत/कथां उपलब्ध हैंन उं'दे च इक्कै पराशक्ति बक्ख-बक्ख संज्ञाएं कन्नै बर्णत होई दी ऐ।

- शास्त्रकारें दा द्रिढ़ बिशवास ऐ जे परमात्मा हर युग च अपनी अलौकिक मर्यादा दा सहारा लेइऐ पुरश जां स्त्रीरूप च अवतार लेंदे न। जिसलै ओह पुरश रूप च अवतार लेंदे न तां जगत च उंदी ब्रह्मा, विष्णु, महेश, बगैरा संज्ञाएं कन्नै स्तुति कीती जंदी ऐ ते जिसलै ओह नारी रूप च अवतार लेंदे न अदूं उ'नें गी महाकाली, महालक्ष्मी ते महासरस्वती आखदे न। जिस चाल्ली ब्रह्मा, विष्णु, महेश-रजोगुण, तमोगुण ते सतोगुण ते प्रधान न उससै चाल्ली देवीशक्ति गुणें अनुरूप भेस धारण करदे होई कम्म करदी ऐ।
- देवी दे रौद्ररूप गी महाकाली आखदे न जो दुष्टें दा संहार करदी ऐ।
- वैष्णव रूप गी महालक्ष्मी आखदे न जो जगत दा पालन करदी ऐ।
- रजोगुण प्रधान शक्ति गी सरस्वती आखदे न जो जगत दी उत्पत्ति ते ग्यान दा संचार करदी ऐ।
- महालक्ष्मी दी किरपा कन्नै गै मानव दी शोभा बधदी ऐ। एह शक्ति सारें दा कारण-रूप ऐ। महासरस्वती अति सुंदर ते तेजस्वी ऐ ते श्रुतियें, शास्त्रें ते संपूर्ण विद्या कलाएं दी स्वामनी ऐ। सरस्वती दी किरपा होऐ तां व्यक्ति महापुरश होई जंदा ऐ। सरस्वती जी दा वाहन हंस ऐ। ओह अंबर ते धरती दौनें पर चलदा ऐ। जिस पर सरस्वती जी दी किरपा होंदी ऐ उस उप्पर महाकाली (युद्ध दा प्रधान देवता) ते महालक्ष्मी (साधन दा देवता) आपूं प्रसन्न होंदी ऐ।
- संपूर्ण जगत दी कारणभूत परमेश्वरी दी पूजा त्र'ऊं रूपें च होंदी ऐ-महालक्ष्मी, महासरस्वती, ते महाकाली। इ'दी मूल प्रकृति महालक्ष्मी ऐ। युद्ध दै समें महालक्ष्मी बी शैरें पर सुआर होंदी ऐ, पर, मैतरें च उं'दा वाहन उल्लू लिखे दा ऐ।

- एह बैश्नो शक्ति सारे संसार दा पालन करने आहली विष्णु दी माया ऐ जिसदे केई नांऽ ते रूप न। पाठकें दे मनै च भ्रम बने दा रौहदा ऐ। इस्सै गल्लै गी दुर्गासप्तशती (ध्याऽ-10 शलोक 1-8) च स्पष्ट कीता गेदा ऐ। जिसलै निशुम्ब मारेआ गेआ तां उसदे भ्राऽ शुम्ब नै देवी गी गलाया, 'तूं झूठ-मूठ दा घमंड निं दस्स। तूं बड़ी माननी बनी दी ऐं, पर, दुइएँ स्त्रियें दी शक्ति दा सहारा लेइऐ युद्ध लड़नी ऐं...? तां देवी नै उसी परता दिता, 'ओह दुष्ट! अ'ऊं ते बिलकुल कल्ली आं। इस संसारै च मेरे सवाए दूई होर कु'न ऐ ? दिक्ख, एह मेरी गै विभूतियां न; इस लेई मेरे बिच्च गै प्रवेश करै दियां न'। इसदे बाद सारी देवियां अम्बिका देवी दे शरीरै च समाई गेइयां। उस बेल्लै सिर्फ अम्बिका देवी रेही जंदी ऐ। देवी ने उसी अगें गलाया, 'अ'ऊं अपनी ऐश्वर्या शक्ति कनै नेक रूपें च इत्थें उपस्थित होई ही। उ'नैं सारें रूपें गी में समेटी लेआ ऐ। अ'ऊं ते कल्ले युद्धै च खड़ोती दी आं। तूं बी इक्कले होई खड़ोई जा'।

- वराहपुराण, ध्याऽ-90) च देवी गी त्रिकला बी आक्खेआ गेदा ऐ। इस पुराण अनुसार च गलाया गेदा ऐ जे 'देवी तेरे गुणें दै अनुसार होर बी नांऽ होंगन ते उ'नैं नांए अनुसार सम्पूर्ण कम्में गी सिद्ध करने दी शक्ति बी होग'। उ'आं इस पुराण च वैष्णवी (बैश्नो) संज्ञा कनै गै बर्णन कीता गेदा ऐ। नारद जी पैहलें बैश्नो कोल गे ते फिरी देवी बारै महिशासुर गी सूचना देने दा बर्णन बी इस्सै ग्रंथ (वराहपुराण) च कीता गेदा ऐ। डोगरी कारक च बी बैश्नो देवी गी दुर्गा नांऽ कनै गै बर्णन कीता गेदा ऐ;

‘बिच्च गुफा दै बैठी ऐ दुर्गा जोत जगै नराली’।

- इऐ वैष्णवी शक्ति सारे संसार गी पालन करने आहली विष्णु दी माया शक्ति मन्नी जंदी ऐ। दुर्गासप्तशती दे पैहले ध्याऽ च 'भगवती महामाया' गलाया गेदा ऐ। 'देवी! तुस्सै महाविद्या, महामाया, महामेधा, महासमृति, महामोहस्वरूपा, महादेवी ते महासुरी ओ। देवी! तुस्सै

संध्या, सावित्री, ते परम जननी ओ। देवी! तुं'दे कन्नै गै इस जगत दी झिझ्टी होंदी ऐ। देवी! तुस्सै इस विश्व ब्रह्मांड गी धारण करदी ओ'। वामनपुराण दे जिस प्रसंग च देवी गी दुर्गा, कात्यायनी, सरस्वती, अम्बिका, परमेश्वरी, भवानी, कौशकी, विंध्यावासिनि, महेश्वरी संज्ञा कन्नै संबोधत कीता गेदा ऐ; उऐ उमा, गौरी, सती, चण्डी, काली ते पार्वती बी ऐ।

- डुगगर च बैशनो (वैष्णवी) तीरथ होने करी में इस कताब च इऐ नांऽ (बैशनो) लिखेआ ऐ। उ'आं वेद साहित्य शा लेइऐ अज्जै तगर शक्ति सम्बन्धी जो बी सहित्य/लोककथां उपलब्ध हैं उं'दे च इक्कै पराशक्ति गी बक्खरी-बक्खरी संज्ञाएं कन्नै बर्णत कीता गेदा ऐ।

- ऋग्वेद च देवी बारै इक प्रसंग इस चाल्ली ऐ :

अम्बितमे! नदीतमे! देवितामे! सरस्वति!

अप्रशस्ता इव स्मसि प्रशस्तिमम्ब! नस्कृधि!!

(ऋग्वेदसंहितायां, मंडल-2, सुक्त-41, ऋक. 16)

मतलब :

हे अम्बितमे! माताएं च श्रेष्ठ माता!

हे नदितमे! नदियें च श्रेष्ठ विद्या सुधा नदीरूप!

हे देवितमे! देवियें च श्रेष्ठ देवीरूप!

हे सरस्वति! अस महत्तवहीन, गरीब, दरिद्र आं।

हे अम्ब! असें गी मान-सम्मान, विद्या बगैरा समृद्धि दा दान कर।

- स्कंदपुराण (अरुणाचल-माहात्म्या खंड) च बी दुर्गा देवी दा शुम्ब, निशुम्ब ते महिशासुर दे बध दा बर्णन मज्जूद ऐ।
- महाभागवत (देवीपुराण) अनुसार श्रीराम जी ने बी कुम्भकर्ण कन्नै

युद्ध करने थमां पैहलें देवी दी स्तुति कीती ही। ध्याऽ-44 च देवी दा नांऽ कात्यायनी दित्ता गेदा ऐ, पर, ध्याऽ-45 च देवी गी जगदम्बा, सुरेश्वरी, दुर्गा दे लावा होर केई संज्ञाएं कन्नै बर्णत कीता गेदा ऐ।

- आदिकुमारी-(डोगरी च अद्धकुआरी) जिस थां देवी नै कुमारी बरत धारण करने दी तपस्या कीती ही उस थां गी आद/आदिकुमारी (अद्धकुआरी) नांऽ कन्नै जान्नेआ जंदा ऐ। इत्थें गै देवी नै अपने प्रमुख त्र'ऊं सरूपें दै प्रतीक त्र'ऊं पिंडियें दी स्थापना कीती ही। इस गुफा च त्रै पिंडियां; महासरस्वती, महालक्ष्मी ते महाकाली दे प्रतीक न। वराहपुराण अनुसार इ'नें त्रौनें पिंडियें दा सामूहक नांऽ वैष्णवी ऐ; मतलब जो महालक्ष्मी ऐ उऐ महसरस्वती ते महाकाली ऐ।
- प्रो. शिव निर्मोही हुंदै अनुसार बैश्नो; वैष्णवी ते लक्ष्मी इक्कै शक्ति दे नांऽ न।
- डोगरी डिक्शनरी च बी बैश्नो देवी दा अर्थ-'दुर्गा देवी; जम्मू प्रांत च कटड़े दै कोल दुर्गा देवी दा प्रसिद्ध स्थान' दित्ता गेदा ऐ-(जम्मू कश्मीर कल्चर अकैडमी, भाग-5 सफा-324)।

भगवान श्रीहरि दी माया होने कारण इ'नें गी नारायणी बी आखेआ जंदा ऐ, वैष्णवी ते दुर्गा इ'दे दूए प्रसिद्ध ते प्रमुख नांऽ न।

- रामचरित मानस च बी तुलसी दास होरें इस्सै देवी दी पैहले श्लोकें च गै बंदना करियै शुरुआत कीती दी ऐ। तुलसी दास होरें उमा, रमा, भवानी, दुर्गा बगैरा केई संज्ञाएं कन्नै संबोधत कीते दा ऐ।
- गुरु गोविंद सिंघ जी होरें बी इस्सै देवी बारै 'चंडी चरित्र' नांऽ दी पुस्तक च विस्तार कन्नै गल्ल कीती दी ऐ। इक छंद च उ'नें महिशासुर दे बल दा अंदाजा इस चाल्ली लाए दा ऐ :-

बहुरि भयो महिषासुर तिन तो क्या किया।

भुजा जोर करि युद्ध जीत सग जग लिया ॥

मतलब, बड़े चिरें बाद महिशासुर नांऽ दा इक राखश पैदा होआ ते उस अपनी बांहियें (बाजू) दे जौरे कन्नै सारे संसार गी जित्तिऐ अपने अधीन करी लेआ।

- डॉ. कर्ण सिंह (पूर्व महाराजा जम्मू कश्मीर) हुंदै अनुसार माता बैश्नो देवी गुफा दी खोज 'त्रिकूट फाड़ियें दै आलै-दुआलै बस्से दे ग्राँई लोकें सदियें पैहलै कीती ही। ग्राँई लोक अक्सर अपना डंगर-बच्छा चारने लेई त्रिकूट फाड़ै पर ओँदे हे। इक रोज इ'नें चरवालें गी इत्थें इक नौजवान कुड़ी मिली। ओह कुड़ी चरवालें कन्नै गल्लां करदे-करदे गुफा आहलै पाससै गई। ऐसा केई रोज होंदा रेहा। किश दिनें परेंत ओह कुड़ी छपन होई गई। लोकें उस दी तपाश शुरू कीती। सारे लोक उस गुफा तगर पुज्जी गे ते दिक्खेआ जे उस थां देवी दियां त्रै पिंडियां स्थित हियां। लोकें उस स्थान गी पवित्तर समझिऐ पूजा-अर्चना आरंभ करी दित्ती'।
- बेशक में देवी दी लीला समझने आस्तै किश पुस्तकें दा अध्ययन कीता ऐ बो मेरी हैसियत नौसिखिये दै बरोबर ऐ। देवी दी लीला अपरम्पार ऐ। इस नाटक गी लिखने आस्तै में मुख स्रोत दे रूपै च मार्कण्डेयपुराण/दुर्गासप्तशती/वराहपुराण गी गै अगँ रक्खे दा ऐ। मेद ऐ तुसें गी पसँद औग। जै माता दी॥

देवी भक्त

'सागर'

जम्मू, जनवरी-1, 2021

* शतश्रृंग उऐ फाड़ ऐ जित्थें देवी दी गुफा ऐ। पुराण साहित्य च इससै फाड़ गी त्रिकूट नांऽ कन्नै बी बर्णत कीता गेदा ऐ। त्रिकूट असल च शतश्रृंग फाड़ै दी टीसी ऐ ते इससै टीसी पर देवी दी पवित्तर गुफा ऐ। डुंगर क्षेत्र च बोलचाल लेई त्रिकूट/त्रिकुटा/त्रिकोट ते त्रिगोट शब्दें दी गै बरतून होंदी ऐ। एह शब्द प्रदेश दे इतेहासकारें बी बरते दे न।

* ग्रँथें च मंदराचल फाड़ै दा जिकर बी आए दा ऐ। इसी हिमला पुतर बी गलाया जंदा ऐ। पांडवें दा जनम बी इत्थें गै होआ हा। महाभारत 1/122-123.

स्रोत समगरी

1. विश्व का सर्वोच्च ज्ञान-चारों वेद : प्रकाशक-दैनिक प्रार्थना सभा, बटाला।
2. श्रीमद् देवी भागवतपुराण : (खंड-1 ते 2) गीताप्रेस, गोरखपुर।
3. श्रीवराहपुराण : गीताप्रेस, गोरखपुर।
4. मार्कण्डेयपुराण : गीताप्रेस, गोरखपुर।
5. श्रीदुर्गासप्तशती : गीताप्रेस, गोरखपुर।
6. महाभागवत (देवीपुराण) : गीताप्रेस, गोरखपुर।
7. नमी चेतना : (अंक-4) पिंगला देवी, लेख : कृष्ण लाल, रामनगर, प्रकाः डोगरी संस्था जम्मू।
8. माता वैष्णो देवी : डॉ. बी के शास्त्री, राजेश प्रकाशन, रघुनाथ बाजार जम्मू।
9. ऋग्वेद च त्रिकुटा फ़ाड़ ते बैश्रणी देवी : लेख, जगदीश चंद्र साठे (शीराज्ञा अंक-2, जून-जुलाई-1987), अकैडमी आफ कल्चर, आर्ट ऐंड लैंग्वेजिज जम्मू।
10. प्राचीण संस्कृत साहित्य च मद्रदेश : लेख, डा.सत्य पाल श्रीवत्स (शीराज्ञा अंक-जून-जुलाई-1987) अकैडमी आफ कल्चर, आर्ट ऐंड लैंग्वेजिज जम्मू।

11. डोगरी लोकगीत : सम्पादक-प्रो. नीलाम्बरदेव शर्मा, प्रो. रामनाथ शास्त्री, प्रका: साहित्य अकादमी नई दिल्ली।
12. डोगरी लोकगीत : (भाग-2) जे एंड के अकैडमी आफ कल्चर, आर्ट एंड लैंग्वेजिज, जम्मू।
13. श्रीवैष्णो देवी दर्शन और नौ देवियां : सम्पादक-ज्वाला प्रसाद चतुर्वेदी।
14. श्रीवैष्णो देवी की अमर कथा : लेखक-आचार्य भट्ट।
15. तुलसीकृत रामचरित मानस : गीता प्रैस गोरखपुर।
16. डुग्गर के देव स्थान : लेखक, प्रो. शिव निर्मोही, विनोद बुक डिपो, जम्मू।
17. गुरू गोविंद सिंह कृत चंडी चरित्र : उक्ति बिलास-डा. ओमप्रकाश, नेशनल पब्लिशिंग हाउस, नई दिल्ली।
18. The Mother Goddess Vaishano Devi : by Lt. Col. Naren Tiwari, Lancer Publisher, New Delhi.
19. Ancient India : by R.C. Majumdar, Pub. Moti lal Banarasi Daas, New Delhi-7.
21. Writ petition of 1986: titled Dr. Karan Singh vs. State of J&K and others (in which Shree Mata Vaishno Devi Shrine Act of 1986 passed by Governor of J&K was challenged in the state High Court Jammu & Kashmir, by Dr. Karan Singh)

पातर :

देवी : * बैशुनो देवी (देवी दे सज्जै-खब्बै किश होर बी कुमारियां हैन)

* जया (देवी दी दुआरपालका/सेवका)

* नारी (पातर-2)

* पुरश पातर (2)

* रिशी (2)

देव-देवते :

* इंद्र

* बिशुणु

* शिव

* ब्रह्मा

* नारद

राखश : * महिशासुर

* विघस (महिशासुर दा महामंत्री)

* प्रघस (महिशासुर दा मंत्री)

* तामर (महिशासुर दा इक सैनापति)

* विद्युत्प्रभ (महिशासुर दा दूत)

जोगी : (गायक) (2)

सूत्रधार/ : इक

आकाशवाणी

(रोचकता बधाने आस्तै निर्देशक सैहकलाकारें दी संख्या बधाई सकदा ऐ।)

अंक-1

द्विश-1

(जोगी मंच दी खब्बी भेठा इक चूहकें पर बैठे दे न। बाकी मंच खाल्ली ऐ। 'बोल्लो शेरेंआहली मां दी-जै'। माता जी दा जैकारा लांदे न ते फही कारक गान लगी पोंदे न।)

बोलन जै-जैकारा माता गढ़ जम्मुआ गी आई।

पैह्ला दर्शन कौल कंडोली दूआ देवा माई ॥

त्रिया दर्शन चरण पादका चौथा अद्ध कुआरी।

पंजमां दर्शन भैरो घाटी दा छेमीं गुफा तुम्हारी ॥

बिच्च गुफा दे बैठी ऐ दुर्गा जागै जोत नराली।

उच्चे भौन माता दे लभदे काले परबतें बाली ॥

चलो चली संग आँदे माता दै जपदे नाम तुम्हारे।

हस्सी-हस्सी दर्शन देऐ बैशनो भगत खड़े दरबारे ॥

जो चली आवै सो फल पावै सिमरदेआं फल पाई।

भगतें गी मां बच्चे दिंदी भैनें गी बीर मलाई ॥

जिस सिमरी उस फल पाया घट-घट जोत सुआई।

घट-घट जोत सुआई; जोतां जागदियां ॥

माता रानी दै दरबार जोतां जागदियां ॥

(कारक मुकदे गै सूत्रधार बोलना शुरू करदा ऐ।)

सूत्रधार : त्रेता युग बिच्च इस धरती पर होए अत्याचार।

पाप बधी गे धरम घटी गे, सारै हा-हा कार॥

राखश लोकें औखा कीता जीना लोकें म्हाल।

देव-देवते, लुकाई तड़फै, नेई सुज्झै कोई सार॥

(इसदैं परैंत दो रिशी घाबरे दे मंच पर दौड़दे आँदे न। उं'दै पिच्छें दो खूंखार राखश फरसे चुक्के दे दौड़ै दे न। इस द्रिश्श च राखशें, रिशियें, आदमियें ते नारियें दी संख्या जैदा कीती जाई सकदी ऐ।)

रिशी-1 : बचाओ! बचाओ!!

रिशी-2 : बचाओ! बचाओ!!

रिशी : (किट्टे सुरै च) बचाओ! बचाओ!! हे महादेव! साढ़ी रक्खेआ करो।

(रिशी ते राखश इससै चाल्ली मंच उपरें दौड़दे केई बारी लंघी जंदे न। फिरी मंच उपर सिर्फ रिशी रेही जंदे न।)

रिशी-1 : हे महादेव! हे इंद्रदेव!! हे विश्णु जी!!! साढ़ी रक्खेआ करो। इ'नें दुश्टें साढ़े धार्मक यज्ञ तैह्स-नैह्स करी छोड़े न। सारे देवस्थान भरश्ट करी छोड़े न। चवक्खै त्राहि-त्राहि मची दी ऐ। राखशलोक मांस, मदरा दा सेवन खु'ल्ले च बेहिए करै दे न। पूरी धरती पर मानव जाति दा जीना दुशवार होई गेआ ऐ ते हून एह राखश साढ़ी जिंदू दै पिच्छें पेई गेदे नै। रिशिएं-मुनिएं दी तपस्या गी भंग करै दे न, उ'नें गी प्रताड़त करै दे न।

रिशी-2 : हे ईश्वर! इ'नें दुश्टें साढ़े केई रिशी-जन मारी दिते न। इ'नें साढ़ा जीना नर्क बनाई दिते दा ऐ। इ'नें पूरी सिश्टी पर बड़ा कैहर चुक्के दा ऐ। सारे देवतें गी इ'नें रूहाई दिते दा ऐ। सुर्गलोक दा संघासन बी खुस्सी लेदा ऐ। सारे देवता इ'ंदे

कोला हारिए सुर्ग छोड़ी चली गे नै। सुर्गलोक ते भूलोक पर
हा-हाकार मचे दा ऐ। हे महादेव! पूरे जगत प्राणिएं दी
रक्खेआ करो।

(राखश मंच पर पुज्जी जंदे न। रिशी फिरी दौड़ना शुरू करी
दिंदे न। मंच पर परती भगदड़ मची जंदी ऐ।)

रिशी : (किट्टे सुरै च) बचाओ! बचाओ!!

(रिशी रोन लगदे न। राखश परती मंच पर आई पुजदे न।
रिशी 'बचाओ-बचाओ' करलांदे मंच थमां नट्टी जंदे न। उसदै
बाद दो आदमी मंच पर दौड़दे आँदे न। राखश उ'आं गै
फरसे चुके दे पीछा करै दे न।)

राखश-1 : पगड़ो! पगड़ो!!

आदमी : (किट्टे सुरै च) बचाओ! बचाओ!!

राखश-2 : मारो! मारो!!

आदमी : (किट्टे सुरै च) बचाओ! बचाओ!!

(इस्सै चाल्ली राखश ते आदमी मंच पर केई बारी लंघी जंदे
न, फही राखश पिच्छें रेही जंदे न। आदमी हफे दे मंच पर
खड़ोई जंदे न।)

आदमी-1 : इ'नें दुश्टें साढ़े रैहन-बसेरे फूकी दित्ते न। पक्की दियां
फसलां नश्ट करी दित्तियां न।

आदमी-2 : इ'नें पापिएं सारी मनुक्ख जाति दा जीना म्हाल करी दित्ता ऐ।
साढ़े पर अत्याचार होऐ करदा ऐ। कुड़ियें, जनानियें दी मान-
प्रतिशठा संकट च पेई गेदी ऐ। हे ईश्वर! एह कैसा कैहर
झोल्लेआ ऐ इस धरती पर। हे ब्रह्मा! हे शिव! इ'नें दुश्टें
कोला धरतीवासियें गी मुक्ति दुआओ।

(राखश परती मंच उप्पर पुज्जी जंदे न। आदमी 'बचाओ-बचाओ' करलांदे नठी जंदे न। आदमियें दे जाने परैंत द'ऊं जनानियां मंच पर करलांदे पुज्जी जंदियां न।)

जनानी-1 : बचाओ! बचाओ!! कोई आइयै बचाओ ॥

जनानी-2 : हे ईश्वर! साढ़ी रक्खेआ करो। साढ़े मान-सम्मान दी रक्खेआ करो। इ'नें करूर राखशें थमां बचाओ।

(राखश अस्त्र-शस्त्र चुक्के दे मंच पर दौड़दे पुज्जी जंदे न।)

राखश-1 : पगड़ो! पगड़ो!!

राखश-2 : पगड़ो! पगड़ो!! इ'नें गी बचिऐ जान निं देओ।

(इस्सै चाली जनानियां अगगें-अगगें ते राखश पिच्छें-पिच्छें दौड़दे मंच पर केई बारी लंघी जंदे न। खीर जनानियां हफी दियां मंच पर खड़ोई जंदियां न। छुपलें पैरें राखश बी मंच पर पुज्जी जंदे न। बल्लें-बल्लें जनानियें पाससै अगगें बधदे न। जनानियां डरदे-डरदे पिच्छें सरकदियां न।)

राखश-1 : हा... हा... हा...(जोरदार गड़ाका मारदा ऐ) आओ साढ़े कोल ते आओ। अड़िओ, साढ़ी प्यास बुझाओ ॥

राखश-2 : (अगगें बधदे होई) जे मंशा निं पूरी होई। साढ़े हत्था जागी मोई ॥

जनानियां : (किट्टी अवाजै च) छंदा बखशो साढ़ी जान। की लेंदे ओ साढ़े प्राण ?

राखश-1 : आओ साढ़े कोल ते आओ। अक्खीं कनै अक्खीं मलाओ ॥

राखश-2 : आओ बिंद कोल ते आओ। दिलै दे बिच्च आई समाओ ॥

जनानी-1 : जाओ-जाओ, कमीने मोएओ।

जनानी-2 : तुं'दे जुलम बधी गे मोएओ॥

राखश-1 : चुक्क हां भाइया फरसा अपना। कर हां ठंडा गुस्सा अपना॥

राखश-2 : लै दौनीं गी मुक्ती देचै। इ'दा जीवन मेटी देचै॥

(दोए राखश फरसे चुक्कियै जनानियें गी मारने दी मुद्रा च
होंदे न। चीख मारियै जनानियां ढेर होई जंदियां न। दर्दीला
संगीत उब्भरदा ऐ।)

(रोशनी जोगिएं पर पौंदी ऐ)

जोगी गा करदे न :

राखश लोकें इस धरती पर कीता जीना म्हाल।

होआ जीना औखा लोकें; रोंदे गास, पताल।

हारी गे सब देव-देवता नेई सुज्झै कोई सार।

किट्टियां होइयां महाशक्तियां करन सोच बचार।

धरमै दी रक्खेआ गितै हून जनमो कोई अवतार।

(द्रिश्श बदली जंदा ऐ)

द्रिश्श-2

(गीत बंद होंदे गै रोशनी मुख स्पाट पर पोंदी ऐ। धार्मक संगीत दी लैहर उब्भरदी ऐ। बड़ा अद्भुत अंबरी द्रिश्श लभदा ऐ। सारे देवते विष्णु ते शिव जी दै अगँ हत्थ जौले करियँ खड़ोते दे न। देवते चार-पंज होई सकदे न।)

देवते : (किट्टे सुरै च) हे ईश्वर! साढ़ी रक्खेआ करो। हे प्रभू!! सब दा भला करो।

आकाशवाणी : जै-जै महाशक्तिओ! हे देवतेओ!! तुं'दी म्हेशां गै जै होऐ।

ब्रह्मा : हे महादेव ! साढ़े सारें पासेआ प्रणाम स्वीकार करो।

शिव : आओ-आओ महाशक्तिओ! तुं'दा सारें दा सुआगत ऐ। (हैरान होइऐ) पर, अज्ज तुस इंद्र समेत सारे देवता इत्थें बैकुंठ कियां पधारेओ। अपनी गल्ल खु'ल्लियै दस्सो।

ब्रह्मा : हे महादेव! पूरे देवलोक च सारे देवता महाबली महिशासुर नै र्हाई दिते दे न, प्रजा बी त्रस्त ऐ। सारै हा-हाकार ते त्राही-त्राही मची दी ऐ। सारी पृथ्वी सुन्न-मसान होई गेदी ऐ। महिशासुर ने सुगँ दा संघासन बी खुस्सी लेदा ऐ ते देवतें गी सुगँ थमां निश्कासत करी दित्ता ऐ। धर्म दै उप्पर घोर अत्याचार होऐ करदा ऐ। भूलोक उप्पर बी असुर लोक थां-थां घूमै-फिरै दे न। पूरी मनुक्ख जाति दुक्खै दी अग्गी च जलै दी ऐ।

शिव : (गुस्सै नै) घोर अनर्थ...? (बदल-जन कड़कने दी अवाज सुनचदी ऐ) ऐसा कु'न ऐ जो साढ़ी शक्ति गी ललकारै करदा ऐ ?

- इंद्र : महादेव! देवतें ते असुरें बशकार पुरे सौ बरें थमां घोर संग्राम होआ र दा ऐ। असुरें दा स्वामी महिशासुर ऐ ते देवतें दा नायक में आपूं आं। अस सारे देवता उस पापी थमां युद्ध च हारी गे आं। उस दुष्टै अपनी बल ते छल-माया कनै अग्नि, पानी, हवा, चंद्रमा, सूरज समेत सारें देवतें गी र्हाइऐ उ'नें गी अपने अधिकार थमां बंचत करी दिता ऐ।
- शिव : हे इंद्र! एह ते बड़ी चिंता दा बिशे ऐ। इस महिशासुर गी कठोर दंड देना लोड़दा ऐ।
- इंद्र : हे महादेव! हून तां राखश बी मनुक्खें आंहगर धरती पर घूमै दे न ते देवता दर-दर भड़कै दे न। प्रभू, तुस्सै साढ़ी रक्खेआ करो। इस दुष्टै दा बध करने दा कोई उपाऽ दस्सो। अजें तगर साढ़े सारें दे यत्न ब्यर्थ गे न।
- सारे : (किट्टे सुरै च) हां महाशक्तिओ! सूर्य, इंद्र, अग्नि, वायु, चंद्रमा, यम, वरुण ते होर देवतें दे अधिकार खुस्सियै महिशासुर आपूं गै सारें दा अधिष्ठाता बनी बैठे दा ऐ।
- शिव : हे देवतेओ! अस सारे उस दुष्ट दे बरताऽ थमां अति फिकरमंद आं। पर, महिशासुर गी ते वरदान प्राप्त ऐ जे उसदी मौत कुसै पुरशै दे हत्थै संभव गै नेई ऐ।
- सारे : (किट्टे सुरै च) हैं...? क्या उस दी मौत कुसै पुरशै दे हत्थै संभव नेई ऐ ? क्या होर कोई उपाऽ नेई ऐ...?
- विश्वणु : हां, उसदी मौत कुसै पुरशै दे हत्थै संभव नेई ऐ, पर, असंभव बी नेई ऐ।
- सारे : (किट्टे सुरै च, हैरानी च) हैं...?
- विश्वणु : पर, उसदी मौत सिर्फ इक नारी दे हत्थै गै संभव ऐ। ब्रह्मा जी ते इस गल्लै गी चंगी चाल्ली जानदे न।

ब्रह्मा : (हरान होइऐ) पर, इक नारी उस बली ते छली असुर कनै
कि'यां मक्रबला करी सकदी ऐ ?

विश्वः : हे देवतेओ! चिंता आहली कोई गल्ल नेई। जेकर अस सारे
देवते अपनी-अपनी दि'ब्ब शक्ति बरतियै इक दि'ब्ब-रूपी
कन्या गी उत्पन्न करिऐ उसी अपने-अपने दि'ब्ब अस्त्र-शस्त्र
प्रदान करचै तां ओह महिषासुर ते ओहदे सारे राखशें दा बध
करी सकदी ऐ।

शिव : हां चक्रपाणि विश्व! एह सुझाऽ बड़ा चंगा ऐ। अस सारे
अपनी-अपनी दि'ब्ब शक्ति बरतियै इक ऐसी दि'ब्ब कन्या
गी उत्पन्न करनेंआं जो इस अत्याचारी दुष्ट दा बध करी
देग।

('ऊं' उच्चारण दै कनै-कनै नि'म्मा-नि'म्मा संगीत बजदा
ऐ। सतरंगी रोशनी प्रगट होंदी ऐ। रोशनी आहली भेठा सारे
देवता अपने हत्थ जौले करदे न।)

सारे : (इक्कै सुरै च)

जनमो, दि'ब्बेआ शक्ति जन्मो ॥

अपनी दि'ब्बेआ शक्ति बरतो।

जनमो दि'ब्बेआ शक्ति जन्मो ॥

पापी दा जो नाश करी देऐ,

ऐसी दि'ब्बेआ कन्या जनमो। हां, ऐसी दि'ब्बेआ कन्या जनमो ॥

सूत्रधार : इस चाल्ली देवतें दे बचन सुनिऐ चक्रपाणि विश्व ते महादेव
ने असुरें उप्पर बड़ा रोह बुझ्जेआ। शिव जी दे मत्थै पर
त्रियुढ़ी तनी गई। मूह त्रेढा होई गोआ। तां अति गुस्सै च
चक्रपाणि विश्व दे मुख थमां इक बड़्हा भारी तेज प्रगट
होआ। इसै चाल्ली ब्रह्मा, महादेव, इंद्र ते होर देवतें दे शरीर

थमां बी बक्ख-बक्ख तेज प्रगट होए, सारे तेज इक थां किट्टे
होई गे। बाद च बड़े उच्चे सुरै च गरजना कीती। उं'दे भयंकर
नाद करी पूरा अंबर गूंजी उट्टेआ। देवतें दिक्खेआ जे उस तेज
दी ज्वाला सारी दिशाएं च फैल्ली गेदी ही। तेज दे किट्टा होने
पर ओह इक कन्या दे रूपै च परिवर्तत होई गेआ। सारे देवतें
केई दि'ब्ब अस्त्र-शस्त्र प्रदान करिऐ देवी दा सम्मान कीता।
देवतें दे नाद कनै गास बी हौला लगन लगा। देवतें दे तेज
पुंज थमां प्रगट होई दी देवी गी दिक्खिऐ महिशासुर द्वारा
सताए दे देवते बड़े खुश होए। देवी दा उच्चे सुरै च कीत्ते
गेदे नाद करी पुरे विश्व च हलचल मची गई। समुंदर कम्बी
उट्टे, धरती डोलन लगी, अंधी-झक्खड़ झुल्लन लगे।

{द्विश्रंश बदली जंदा ऐ।}

द्रिश्श-3

(थोहड़े चिरै बाद, रंग-बरंगी रोशनी मंच दै मझाटै स्पार्ट पर पौंदी ऐ। देवी लाल वस्त्रें च सुशोभत ऐ। हत्थें च शंख, त्रिशूल, कृपाण, चक्कर बगैरा केई अस्त्र-शस्त्र धारण कीते दे न। त्रै नेतर न। शेरें पर बराजमान ऐ। ओठें पर हलकी-हलकी मुस्कान ऐ।)

सारे देवते : (देवी गी प्रणाम करदे होई जै-जै करदे न) जै देवी! जै!! जै!!! देवी, तुं'दी सदा गै जै होऐ।

देवते : (किट्टे सुरै च) देवी! तुस कु'न ओ ? विज्ञानमयी, तुस केह करना चांहदी ओ ?

बैश्नो : हे देवश्रेष्ठो! में ते तुं'दी गै द्रिष्टि कनै उत्पन्न होई दी आं। केह तुस लोग अपनी परमेश्वरी शक्ति गी नेई जानदे ?

विष्णु : देवी, तुस पूरे विश्व दी माता ओ। तुस अति बल संपन्न वैष्णवी शक्ति ओ; तुस दुर्गा ओ।

देवता : (किट्टे सुरै च) देवी तेरा नांऽ 'त्रिकला' होग। तुस विश्व दी म्हेशां रक्खेआ करेओ। गुणें अनुसार तेरे होर बी बड़े सारे नांऽ होंगन। वैष्णवी तेरा इक प्रमुख नांऽ होग।

बैश्नो : मेरा नांऽ वैष्णवी ऐ...?

विष्णु : हां देवी, वैष्णवी बी तुं'दा इक प्रमुख नांऽ ऐ। सारे देवतें अपनी-अपनी दि'ब्ब शक्ति प्रदान करिऐ थुहाड़ा वर्तमान रूप

प्रदान कीता ऐ। देवी! सारी विद्यां जो स्रिष्टी पर हैन, थुहाड़े गै बक्ख-बक्ख रूप न। जगत च जिन्नी बी स्त्रियां हैन तुं'दी गै मूर्तियां न। हे जगदम्बा! इक मात्र तुसें गै इस विश्व गी व्याप्त करी रखे दा ऐ।

बैश्नो : हे महाशक्तिओ! तुसें मेरा वर्तमान रूप किस लेई प्रदान कीता ऐ...?

ब्रह्मा : देवी! तुं'दी उत्पत्ति दा बड़डा कारण स्रिष्टी पर फैल्ले दे अत्याचार गी समाप्त करना ऐ ते धर्म दी रखेआ करना ऐ। लुकाई दी रखेआ करना, देवतें दी पदवियें ते मान-सम्मान गी ब्हाल करना ऐ।

इंद्र : हां देवी जी, महिशासुर ते उसदे असुरें भूलोक ते सुर्गलोक पर बड़ी तबाही मचाई दी ऐ। इस कारण सारै त्राही-त्राही मची दी ऐ। इ'नें राखशें थमां सताई दी सारी बस्सोआं पृथ्वी छोड़ी इद्धर-उद्धर नस्सी-भज्जी गेदी ऐ। देवतें थमां सुर्गे दा संघासन बी उस खुस्सी लेआ ऐ। सारे देवते उस कोला हारी गे न।

विश्व : हे वैष्णवी! इस आस्तै तुस पृथ्वी पर जाओ। पाप ते पापी गी समाप्त करो। धर्म ते मानवता दी रखेआ करो। दुखिएं दे दुख-दर्द दूर करो। सारे विश्व दी रखेआ करो। पृथ्वी ते सुर्गलोक पर अमन-शांति गी ब्हाल करो। जन कल्याण करो। देवतें दा भला करो।

सारे : (किट्टे सुरै च) भला करो। देवी जी, भला करो॥ तुसें गी साढ़ा कोटि-कोटि प्रणाम ऐ। जै होऐ, देवी जै होऐ। तुं'दी सदा गै जै होऐ।

बैश्नो : पर, एह सारे कम्म करने आस्तै मिगी शक्ति कु'न प्रदान करग।

विष्णु : देवी! तूसें एह सारे कम्म आपूं अपनी प्रेरणा कनै करने होंगन। इस्सै लेई तूसें गी सारें देवतें अपने नेकां दि'ब्ब अस्त्र-शस्त्र प्रदान करी दित्ते न तां जे तूस बिना कुसै दी सहायता दै पाप ते पापी दा नाश करी सको।

शिव : देवी! सारें देवतें दी इऐ मंछा ऐ जे हून तूस पूरे संसार दी रक्खेआ करो।

सारै : (इक्कै सुरै च) देवी! साढ़ी सारें दी बिनती ऐ जे हून तूस पूरे विश्व दी रक्खेआ करो।

बैश्नो : हे महाशक्तिओ! तुं'दी इच्छेआ अनुसार में विश्व च अमन-शांति ब्हाल करने दा पूरा पूरा प्रयास करंग।

देवता : (सारै इक सुरै च)

जै देवी जै। तेरी सदा गै जै होऐ॥

धर्म दी रक्खेआ करेओ जाइऐ।

दुखिएं दा दुख हरना जाइऐ॥

हां, धर्म दी रक्खेआ करनी जाइऐ।

दुखिएं दा दुख हरना जाइऐ॥

(देवते फही 'जै-जै' करदे न। जोगी कारक गाना शुरू करदे न।)

शक्ति कौन देव ने पैदा कीनी; कौन देव नै मानी।

शक्ति ओंकार ने पैदा कीनी शिव शंकर नै मानी॥

कौन देव तेरी तपे रसोइया कौन भरै जल पानी।

सूरज देव तेरी तपै रसोइया इंद्र भरै जल पानी॥

जोतां जागदियां दरबार, म्हाड़ी माता दे दरबार।

तैरै झंडा झुल्लै दरबार, म्हाड़ी माता दे दरबार॥

{द्रिश्श बदली जंदा ऐ।}

द्रिश्श-4

(जंगल-जाड़ दा द्रिश्श। ढोल-ढमक्का बज्जै दा ऐ। चार पंज
राखश नच्चै-त्रप्पै दे न। नारद जी दा प्रवेश होंदा ऐ।)

नारद : नारायण! नारायण!!

(राखश नारद जी दी गल्ल अनसुनी करदे होई जोरदार
गड़ाका मारदे न)

राखश : हा हा हा...,!!!

राखश-1 : शक्तिशाली। शक्तिशाली ॥ साढ़ा राजन शक्तिशाली ॥
शक्तिशाली साढ़ा राजन। शक्तिशाली साढ़ा राजन ॥

राखश-2 : नच्चो-त्रप्पो।

राखश : (सारे किट्टे सुरै च) शाबा! शाबा!!

राखश-1 : चौंनें-कूटें...?

राक्षश : साढ़ा दा'वा।

राखश-1 : साढ़ी हस्ती...?

राखश : तपदा लावा।

राखश-1 : धरती अंबर...?

राखश : साढ़ा सारा।

नारद : नारायण! नारायण!!

राखस-2 : धरतीबासी...?

राखश : थर-थर डरदे।

- राखश-1 : देव-देवते... ?
- राखश : साढा पानी भरदे।
- राखश-2 : जो कोई उच्चा होइऐ लंघदा...?
- राखश : ओहदा सिर निं सामां लभदा।
- राखश-1 : जो कोई साढ़ै अगँ अड़दा...?
- राखश : ओह निं फही तां जींदा लभदा॥
- नारद : (टोकदे होई) सुनेआ कोई देवी आई...?
खासी उसनै धुम्म मचाई...??
- राखश : जी कैसी तुसें बात सुनाई।
- नारद : उस दित्ता थुहाड़ा मान घटाई।
- राखश-2 : (गुस्से च) लगदा उसदी शामत आई।
- राखश : उस लैनी ऐ जान मुहाई।
- नारद : सारे उसगी देवी मनदे।
गुणगांदी ऐ दुनिया उसदे॥
- राखश-1 : उसदी शक्ति मेटी देगे।
उसदी हस्ती मेटी देगे॥
- नारद : दि'ब्बशक्ति ओह ऐ अड़ेओ।
तेज ऐ उसदै मुखड़े अड़ेओ॥
- राखश : सोचो-सोचो इस दी कारी।
आओ करचै एह दूर बमारी॥

राखश-2 : आओ असुरेश्वर गी सुनाचै।

राखश : हां, आओ असुरेश्वर गी सुनाचै॥

(सारे चली जंदे न)

{द्रिश्श बदली जंदा ऐ।}

अंक-2

दृश्य-1

(महिशासुर दा दरबार लग्गे दा ऐ। धूड़-मतूड़ा शरीर, बाल खिल्लरे दे, शरीरै पर नां-मात्र टल्ले न। केई चाल्ली दे अस्त्र-शस्त्र धारण कीते दे न। महिशासुर दे अट्ट मंत्री न, अट्ट चौकियां लग्गी दियां न। निर्देशक इंदी संख्या घट्ट करी सकदा ऐ। में इत्थें द'ऊं मंत्रिएं दा गै वार्तालाप लिखे दा ऐ। नारद जी दी गल्ल चलै दी ऐ।)

नारद : नारायण! नारायण!! हां राजन। ओह अतिसुंदर नारी ऐ। सारी लुकाई उसगी देवी मनदी ऐ। ओहदे मुख दे प्रकाश कन्नै पूरे हिमाले पर्वत पर चानन खिल्लरी दी ऐ।

महिशासुर : हैं...? पर, नारदमुनि जी तुसेंगी कि'यां पता ऐ ?

नारद : असुरेंद्र! में ब्रह्मलोक, इंद्रलोक, कैलास परबत ते उसदै परेंत उस देवी दे दर्शनें लेई गेदा हा। उस देवी गी प्रणाम करिऐ आकाशमार्ग रस्तै समुद्र च स्थित तुंदी राजधानी पुज्जी गेआं।

महिशासुर : अच्छा, एह गल्ल ऐ। अगली गल्ल सुनाओ।

नारद : असुरेंद्र! विश्व च इक रत्न दै बरोबर ओह कन्या उत्पन्न होई दी ऐ। जिसलै में उस देवी कोल गेआ हा, उत्थें में देवी दी पुरी दिक्खी जेहड़ी सैंकड़ें कुमारिएं कन्नै व्याप्त ऐ। उंदे चा

सारें शा जो प्रधान ऐ, उऐ जेही देवतें, देत्यें ते यक्षें दै इद्धर
बी कोई सुंदर कन्या नजरी नेई औंदी।

महिशासुर : नारद जी, सच्चें गै ओह इ'न्नी सन्हाकड़ी ऐ ?

नारद : असुरेंद्र! ओह ते अति सुंदर अंगें नै सुशोभत ऐ। में ऐसी
कन्या पूरे ब्रह्मांड च कदें कुतै निं दिक्खी।

महिषासुर : हैं, इ'न्नी सुंदर...?

नारद : जी हां। सारे देवता, गंधर्व, रिशी ते होर केई दैतें दे अधिपति
बी उस कन्या दी उपासना करदे न।

महिशासुर : उपासना करदे न...?

नारद : पर, देवते ते गंधर्वें उप्पर जो जित्त प्राप्त करने च समर्थ नेई
होऐ, ऐसा कोई बी व्यक्ति उस कन्या गी जित्तने च समर्थ
नेई होई सकदा ऐ। हां, असुरेश्वर! ऐसा सुंदर रूप में ते केह,
कुसै नै बी, कदें कुतै निं दिक्खेआ होना। ओहदे मुखड़े दे
तेज दा प्रकाश झलना बी औखा ऐ।

महिशासुर : नारदमुनि जी ओह कु'न नारी ऐ,...?

नारद : हे असुरेश्वर! नारियें च ते ओह नि'रा रत्न ऐ। तुं'दे संघासन
दी शोभा बधाने जोग ऐ।

महिशासुर : सुंदर...? अति सुंदर...? अब्हुत...? रत्न...?? हा...हा...(जौरे
नै गड़ाका मारदा ऐ।)

नारद : हां, असुरेश्वर! ओह सच्चें गै इक रत्न ऐ। आखो अंबरा
उप्परा कोई अप्सरा उतरी आई दी होऐ। असुरेंद्र! हून मिगी
जाने दी अनुमति देओ। नारायण! नारायण!!

महिशासुर : नारद जी, तुस जाई सकदे ओ।

(नारद झटपट चली जंदा ऐ। उसदे जाने परेंत मंत्री प्रघस महिशासुर पासै संबोधत होंदा ऐ।)

प्रघस : राजन! ओह कोई अप्सरा नेई ऐ। लगदा ऐ जे ओह कोई छल-विद्या ऐ। नारदमुनि जी ने जिस कन्या दी गल्ल थुहाड़ै कनै कीती ऐ, ओह ते म्हान देवी ऐ ते बैश्नो देवी नांऽ कनै प्रसिद्ध ऐ। सुंदर रूप धारण करने आहली उस देवी गी पराशक्ति गलाया जंदा ऐ, पर, उस दा अपहरण करना ठीक नेई होग।

महिशासुर : मंत्रीश्रेष्ठ, तुस अपने बचार प्रगट करो।

विघस : राजन! उस देवी दे बारै च जो मंत्री प्रघस नै सुनाया बिलकुल सच्च ऐ, (फही बाकी मंत्रिएं पासै संबोधत होंदा ऐ।) पर, जे कर सारें दा समर्थन होऐ तां असें गी राजन लेई उस कन्या दा वर मंगी लैना चाहिदा।

सारे मंत्री : (किट्टे सुरै च) हैं...? वर मंगी लैना चाहिदा...?

विघस : हां, मंत्रीवरो! जेकर मेरी गल्ल ठीक लगै तां असें सारें मंत्रियें गी उस देवी कोल जाइऐ प्रार्थना करनी चाहिदी ऐ।

महिशासुर : (रोहै नै) प्रार्थना...? उस बैश्नो अगैं...?? कैसी प्रार्थना...???

विघस : हां, राजन! पैहलें असें गी साम निति कनै कम्म लैना चाहिदा। जेकर इस कनै कम्म निं बनै तां दान दा सहारा लैना चाहिदा; दान कनै बी कम्म निं बनै तां भेद निति दा सहारा लैना लोड़दा ते जेकर इस कनै बी कम्म निं बनै तां खीर च दंड नीति दा प्रयोग करना चाहिदा।

प्रघस : पर, सुनने च आया ऐ जे ओह साढ़े राजन दे राज संघासन बरुद्ध रिशी-मुनियें ते लुकाई गी भड़का करदी ऐ ते पूरी लुकाई च उसी देवी दा सम्मान प्राप्त ऐ।

- महिशासुर : (तिलमलाइऐ) देवी...? मंत्री प्रघस उसी देवी मत कुआलो...।
- विघस : असुरेश्वर! एह सच्च ऐ जे उस दी नीति असुरेश्वर दै बरुद्ध ऐ।
- महिशासुर : (कचीची बट्टिऐ) कुसदी इ'न्नी हिम्मत जे मेरे संघासन दै बरुद्ध कोई साजश रचै ?
- विघस : असुरेश्वर! एह कोई सधारण नारी नेई लगदी।
- महिशासुर : अच्छा ? एह दस्सो जे इसदा थौह-ठकाना कुत्थें ऐ...?
- विघस : कोई पता निं लग्गा असुरेश्वर! साढ़े दूतें पैहलें गै अति छानबीन कीती ऐ, पर, इस दे थौह ठकाने दा कोई पता निं चलेआ। सिर्फ इ'न्ना गै पता चलेआ ऐ जे इसदा नांऽ बैश्नो ऐ ते ओह अपना प्रचार करिऐ सारें गी साढ़े बरुद्ध भड़का करदी ऐ। ओह थां-थां थुहाड़ा नरादर करै दी ऐ।
- महिशासुर : (गुस्से च) नरादर...? मेरै बरुद्ध प्रचार...?? हा... हा... (जोरै नै हसदा ऐ।) घोर अपराध...? घोर अनर्थ...?? उसदी इ'न्नी हिम्मत ? ओहदी एह मजाल...?? उसी इ'न्ना घमंड ऐ ? शैद उसी एह पता निं जे इसलै अंबर, पताल, ते पृथ्वी पर कोहदा राज ऐ ?
- विघस : बस तुं'दा गै राज ऐ राजन।
- महिशासुर : (गुस्से नै दंद करीचदा ऐ) ...बैश्नो...? हूं...?
- विघस : असेंगी इसदे शड़यंत्र दा पूरा पता लाइऐ इस कनै बदला लैना पौना ऐ।
- महिशासुर : (जोरै नै) बदला...। बदला...॥ हां... जरूर बदला लैता जाग।

प्रघस : असुरेश्वर! असेंगी इस बारै किश गंभीरता नै सोचना लोड़दा।

महिशासुर : हा...हा... (गड़के दै बाद) सोची लेआ। सोची लेआ॥ इसदा उपाऽ बी सोची लेआ।

प्रघस : केह सोचेआ असुरेंद्र ...?

महिशासुर : सोची लेआ एहदा उपाऽ बी। पर, इस थमां पैहलें इस बैश्नो दा पूरा-पूरा थौह-ठकाना, मां, बब्ब, रिश्ते-नातें सब दा पता लाओ। हां ते उ'नैं लोकेँ दा बी पता करो जो लोक इसदी गल्लें च औंदे न ते इस दे समर्थक बने दे न। एह लोक बी सप्पें दे सपोले न।

प्रघस : पर, तुस कोई उपाऽ दी गल्ल करै दे हे।

महिशासुर : हां, उपाऽ बी सोची लेदा ऐ।

प्रघस : राजन! दना गल्ल ते सपष्ट करो।

महिशासुर : ऐहदा उपाऽ ऐ...रुकावट...। बिघन...। अत्याचार...। साधू-सैंतें दे यज्ञें च खलल पाना। लुकाई दे हर कम्म च रुकावट उत्पन्न कीती जा। इ'दें सुखें च दुक्ख भरी देओ। इ'दी रोशनी च न्हेरा भरी देओ।

विघस : जी असुरेश्वर। ऐसा गै कीता जाग।

महिशासुर : ...ते जो इस बैश्नो दे अनुयायी बने दे न उ'दे घर-कोठे सब फूकी देओ। इ'दी पक्की दियां फसलां नष्ट करी देओ तां जे एह दुष्ट लोक नाजै दे दाने-दाने गी मुत्ताज होई जान। सारे सर ते तलाऽ खुशक करी देओ जां उ'दे च जैहर भरी देओ तां जे एह लोक पानी दे तोपे-तोपे गी तरसन, ते एह लोक तरेहाए दे तरसदे, तड़फदे मरी-खपी जान। इ'दी जिंदु उप्परा बोटी-बोटी नोच्ची लैती जा। (कचीची बटदा ऐ।)

सारे : (किट्टे सुरै च) एह लोक पानी दी तोपे-तोपे गी तरसन ?
हा...हा... हा...

भुक्ख इ'नें गी निंगली जा। हा...हा...हा...

अगग इ'नें गी फूकी टकाऽ। हा...हा...हा...। (सारे हसदे न)

विघस : एह बड़ा उचत सोचेआ, राजन। एह बलहीन, बुद्धिहीन लोक
ते सारे देवता लाचार होइऐ तुं'दी मुट्ठी च आई जांगन।

महिशासुर : मुट्ठी च निं औंगन तां जांगन कुत्थें...?

प्रघस : ...ओह सब जांगन मौती दै मूंह।

महिशासुर : ...ते में इ'नें दुष्टें गी अपने काबू च करी लैंग। जो मेरी शरणै
च नेई औंगन उ'नें गी तड़फाई-तड़फाइऐ मारी देंग। इ'नें गी
नोच्ची-नोच्ची खाही जांहग। हा...हा...। (जोरें नै हसदा ऐ।)

प्रघस : बिलकुल उचत सोचेआ राजन।

महिशासुर : मंत्रीश्रेष्ठ ...?

विघस : जी राजन...!

महिशासुर : अपने देत्या योधें गी गलाया जा जे बैश्नो दे समर्थकें दी
कुड़ियें, स्त्रियें दा अपहरण करी लैन। अपहरण...। ब्याह...।
हा...हा...। (फही जोरदार हासा) दिक्खना एह कमीने जंदे
कुत्थें न?

विघस : जी असुरेश्वर! तुं'दे हर आदेश दा पालन कीता जाग।

महिशासुर : जाओ, इ'दा जीना, मरना, उट्टना, बौहना, सौना, जागना सब
औखा करी देओ। इ'दे हासे, गड़ाके, खुशियां ते इ'दी सुख-
शांति सब खुस्सी लेओ। बाहू दे फनूकें दा रुख मोड़ी देओ।
इ'दें रैहन-बसेरें गी अगग लाई देओ। इ'नें गी एहसास कराओ

जे महिशासुर किस हस्ती दा नांऽ ऐ ? जाओ मेरे आदेश दी
पालना करो। मेरी हस्ती ? हा...हा... (हसदा ऐ) मेरी शक्ति ??
हा... हा...(अति डरौना हासा हसदा ऐ। रोशनी बंद होई जंदी
ऐ।)

{द्रिश्श बदली जंदा ऐ।}

द्विशः : 2

(अफरा-तफरी दा द्विश। मंच पर काफी रौला-रप्पा पेदा ऐ।
राखश लोकें गी मारै, लताड़ै दे न। लोकें 'हाय-हाय',
'बचाओ-बचाओ' दा करलद पाए दा ऐ। राखश 'मारो-मारो'
आखदे लोकें पिच्छें दौड़ै दे न। साधुजन बी लोकें कन्नै दौड़ै
दे न। उं'दे यज्ञ बगैरा जुआड़ी दिते गेदे न। हवन समगरी
तांहीं-तुआंही खलारी दिंदे न। राखशें अगगी दे मसैहरे बी
हत्थें च पगड़े दे न। बाद च रोशनी इक स्पाट पर पौंदी ऐ।
द'ऊं आदमी मंच दै सामनै आई जंदे न।)

सारे : हे ईश्वर! बचाओ। बचाओ॥

आदमी-1 : इ'नें राखश पापिएं! इ'नें दुष्टें साढ़ियां पक्की दियां फसलां
नश्ट करी दितियां न। फलें दे बाग-बगीचे बी जुआड़ी दिते
न।

आदमी-2 : इ'नें दुष्टें साढ़े घर-कोठे फूकी दिते न। इ'नें पापिएं पूरे जल
स्रोत बी जरीले करी टकाए न। अस हून पानी कुत्थूं पीगे ?
हे ईश्वर! साढ़ी इस सन्हाकड़ी धरती उप्पर तूं कैसा कैहर
झोलेआ ऐ। हे देवी! साढ़ी रक्खेआ करो। इ'नें राखशें थमां
असें गी बचाओ।

(पिच्छुआं राखशें दा जोरदार हासा सुनचदा ऐ।)

आदमी-1 : हे ईश्वर! इ'नें पापिएं एह सुंदर शैल धरती कैसी नरक बनाना
लाई ऐ। मनुख छोड़िए हून ते पशू, पखेरू बी सैहमी गेदे

न। सारे जीव-जैतू अपने-अपने रहन- बसेरे छोड़िए इत्थोआं
जान लगी पे न। नारियें दे सुहाग उज्जड़ी गे न। केई कुमारियें
दा अपहरण होई चुके दा ऐ। उ'नें गी सताया जा दा ऐ। बच्चें
पर बी अत्यचार होआ करदा ऐ। हे देवेश्वरी! साढ़ी रक्खेआ
करो। इ'नें दुष्ट राखशें थमां असें गी बचाओ।

(किश राखश चान-चक्क आदमिएं कोल पुज्जी जंदे न ते
डरौनी सूरत बनाइऐ उ'दै पासै घूरदे न।)

राखश-1 : हून निं औनीं तु'दी देवी।

राखश-2 : हून निं बचदी जान थुहाड़ी।

(आदमी पिच्छें-पिच्छें हटदे न, राखश अगें-अगें होंदे न।)

राखश-1 : (किट्टे सुरै च) मारो। मारो॥ पगड़ो। पगड़ो॥ कुसै गी बचिऐ
जान निं देओ।

आदमी : (सारे इक्कै सुरै च) बचाओ। बचाओ॥ साढ़ी रक्खेआ करो
देवी। देवी, असें गी आइऐ बचाई लेयो।

आदमी-1 : ओ पापिओ! बस्स करो। तु'दे अत्याचारें दी अति होई गेई
ऐ, हाड़ सिरै दै उप्परें लंघन लगी पेआ ऐ। बस्स हून इ'यां
लगन लगा ऐ, जि'यां...?... जि'यां...??

आदमी-2 : (गल्ल पुड़छदे होई)... इ'यां लगन लगा ऐ जि'यां कोई
बड़ा भूंचाल औने आह्ला ऐ जां कुतै धरती फट्टने आहली ऐ।

आदमी-1 : (राखशें पासै संबोधन करदे होई) राखशलोको, तु'दे अत्याचारें
दा ऐत बड़ा नेड़ै उठे आया ऐ। बस थोहड़े जे सबर दी लोड़ ऐ।

राखश-1 : चुप होई जा मूरखा...। मूह बंद रक्ख, नेई तां मुंडी धड़ै थमां
बक्ख करी देंग।

आदमी-2 : हे असुरो! एह प्रकृती दा नियम ऐ जे घुप्प न्हरे परेंत सूरज अपनी सुंदर सतरंगी किरणें दी रोशनी खलारदा ऐ ते नमें जीवन दा सनेहा दिंदा ऐ। (लम्मा साह भरदा ऐ।) आह! हून इ'यां बजोऐ करदा ऐ जे दुखडें दा न्हेरा तौले गै खत्म होने आह्ला ऐ ते नमीं खुशियां, मेदां लेइऐ इक शैल सन्हाकड़ी सवेर औने आहली ऐ।

राखश-2 : खुशियां....? हा... हा...। मेदां...?? हा...हा...। (फही बाकी राखशें दा हासा बी ओहदे हासे नै रली जंदा ऐ।)

आदमी-1 : हे असुरलोको! तुं'दै अगें छंदा ऐ जे संसार दी भलाई आस्तै एह अत्याचार दा रस्ता छोड़ी देओ। हिरख, समोध कनै जीओ ते सारें गी जीन देओ।

राखस-1 : ओए, कोहदी भलाई ? कैसी भलाई ?? हा...हा...(राखश डरौना जेहा गड़ाका लांदे न।)

आदमी-2 : हे असुरो! इस धरती गी छोड़िऐ पताललोक चली जाओ। थुहाड़ा इस्सै च भला ऐ।

आदमी-1 : जाओ, देवी बैशनो कोल जाइऐ क्षमां प्रार्थना करो। देवी बड़ी दयालू ऐ ओह जरूर तुसें गी माफ करी देग। दुष्टो, देवी दे चरणें च जाई डिगो; नेई तां देवी तुसें सारें गी मारी मुकाई देग।

राखश-1 : जाओ। जाओ ॥ नटो इत्थोंआं। आई बड्डी देवी तुं'दी।

आदमी-2 : ओह देवी इक दि'ब्ब-शक्ति ऐ। ओह तुं'दी बी रक्खेआ करग।

राखश-2 : जा...जा... आया बड्डा दि'ब्ब-शक्ति आला। दिक्खी लैगे तुं'दी दि'ब्ब-शक्ति गी बी।

- आदमी-1 : असुरलोको! हिरख-समोध कनै रौहना प्रकृति दा नियम ऐ ते लड़ाई-झगड़ा प्रकृति दे नियम बरुद्ध ऐ।
- आदमी-2 : इस आस्तै लड़ाई-झगड़े दा राह त्यागी देओ। शांति ते प्रेम दा रस्ता अपनाओ।
- राखश-1 : जाओ। जाओ॥ परें हटो। आए बड़डे शांति ते प्रेम दा पाठ पढ़ाने आले। मूरखो, तुसें गी साढ़ी शक्ति दा किश ग्यान नेई ऐ।
- राक्षश-2 : मूरखो, तुसें गी ग्यान देने लेई गै ते अस इत्थें आए आं।
- आदमी-1 : तुस नीच ओ। थुहाड़ा राजन नीच ऐ।
- आदमी-2 : महिशासुर पापी ऐ, अत्याचारी ऐ।
- आदमी-1 : महिशासुर अपनी शक्ति दा दुरुपयोग करै दा ऐ ते उस्सै दी शैह पर तुस लोक लुकाई गी प्रताड़त करै देओ।
- राखश-1 : अस तुं'दा सर्बनाश करी देगे।
- आदमी-1 : मां बैशनो तुं'दा सर्बनाश करी देग।
- राखश-2 : राजन तुं'दा ते तुं'दी देवी दा सर्बनाश करी देंगन।
- आदमी-2 : देवी महिषासुर दी शक्ति दा समूलनाश करी देग।
- राखश-1 : परें हट होए। ओह केढ़ा ऐ मौरी नै जम्मे दा जो महाबली असुरेश्वर दी शक्ति गी ललकारै ? अस हर भूलोकबासी गी भस्म करी टकागे।
- राखस-2 : हां, अस हर प्राणी गी मारी मुकागे। कच्चा चवाई जागे।
- आदमी-1 : जदू-जदू बी कदेँ इस धरती पर जुलमै दा कोई झक्खड़ झुलदा ऐ तां कोई ना कोई शक्ति अवतार बनिऐ धरती पर आई जंदी ऐ।

- आदमी-2 : ...ते ओह शक्ति दा अवतार तुं'दा सर्वनाश करी देग। तुं'दे असुरराज गी समाप्त करी देग। इस धरती पर परतिऐ सुख-शांति होग।
- राखश-1 : हाए ओए...। आए बड़डे भविक्खवाणी करने आहले। पैहलें अपनी जिंदू दी खैर ते मंगो। (कटार लेइऐ घूरदा ऐ)
- राखश-2 : कमीनेओ, असें गी उस अवतार दा नांऽ बी दस्सी ओड़ो।
- आदमी-2 : उस शक्ति दा नांऽ ऐ वैष्णवी; बैश्नो देवी। असें गी पूरा बिश्वास ऐ जे देवी सारें दा भला करग।
- राखश : (किट्टे सुरैं च) हैं बैश्नो...? ओए, केढ़ी बैश्नो...??
- आदमी-1 : हां हां बैश्नो। मां बैश्नो दी शक्ति अपरंपार ऐ।
- राखश-1 : हाए ओए देवी मां देओ पुत्रो।
- आदमी-2 : हां मां बैश्नो। जाओ अपने महिशासुर गी गलाओ जे तुं'दा सारे दा काल बड़ा नेड़ै आई गेआ ऐ। हून महिशासुर ते थुहाड़े जुलमें दा ऐंत तौले गै होने आहला ऐ।
- आदमी-1 : महिशासुर गी जाई गलाओ जे जेकर उसी अपना भला लोड़दा ऐ तां मां बैश्नो दे चरणें च डिगिऐ माफी मंगी लै।
- राखश-2 : माफी...? कैसी माफी...?? हा... हा... (हसदा ऐ।) तुं'दी देवी कोला माफी...? जाओ-जाओ। आए बड़डे माफी दुआने आहले।
- राखश-1 : बंद करो बकवास अपना।
- राखश-2 : कैसा इ'नें बैहमै गी पालेआ ऐ।
- राखश-1 : जरन्ना किन्ना अरसा भाइया ?

राक्षश-2 : कट्टु हां पैन्ना फरसा भाइया।

राखश-1 : हां, आ ई'दे टोटे-टोटे करचै।

राखश-2 : अपने भुक्खे ढिड्डै गी भरचै॥

(राखश फरसे चुक्कियै मारने दी मुद्रा च होंदै न। मंच पर परतियै भगदड़ मची जंदी ऐ।)

आदमी : (किट्टे सुरै च) बचाओ-बचाओ। देवी बचाओ। मां बैश्नो बचाओ॥ इ'नें दुष्टें थमां साढ़ी रक्खेआ करो।

(मारने लेई शस्त्र घूरदे न, आदमी करलाइऐ ढेर होई जंदे न। रोशनी जोगियें पर पौंदी ऐ।)

जोगी गाना शुरू करदे न :

राखश लोकें इस धरती पर कीता जीना म्हाल।

होआ जीना औक्खा लोकें कंबदे गास पताल।

हारी गे सब देव-देवता नेई सुज्झै कोई सार।

जी नेई सुज्झै कोई सार।

{द्रिश्श बदली जंदा ऐ।}

द्विश : 3

(देवी दा दरबार सज्जे दा ऐ। शेर बी माता दे कन्नै ऐ। माता लाल वस्त्रें ते केई दि'ब्ब अस्त्रें-शस्त्रें नै सुशोभत ऐ। किश होर कुमारियां बी देवी दै आसै-पासै खड़ोती दियां न। देवी उच्चे आसन पर बराजमान ऐ। ओहदे उप्पर रंग-बरंगी रोशनिएं दा प्रकाश पवै दा ऐ। देवी अपने अनुयाइएं गी संबोधन करै दी ऐ।)

बैश्नो : हे भक्तो! परमेश्वर पूर्ण ऐ। ओह जगत दी उत्पत्ति, पालन ते संहार करदा ऐ। एह कम्म करने लेई ओह अपने आप गी स्त्री ते पुरश द'ऊं रूपें च प्रकट करदा ऐ। जो वीर पुरुश न, ओह शेर न। शेर पर महाकाली दी सुआरी ऐ। मत्थे पर चंद्रमा ऐ, जो भक्तें गी नंद ते प्रकाश दिंदा ऐ। जिसलै ओह रोहें ओंहदी ऐ उसलै ओह राखसैं उप्पर चक्र चलांदी ऐ। संसार-चक्र अपने पापें कन्नै लड़दा ऐ ते ओह नष्ट होंदा रौहदा ऐ। ओह इक दुए गी चक्र-अस्त्र-शस्त्र नै चौड़ करदा ऐ। इऐ भगवती जी दा परोख चक्र-संचालन ऐ। बागै दे खराब बूटें गी माली पुट्टिए सुटी दिंदा ऐ ते उसदी शोभा बधांदा ऐ। उसदी एह निपुणता ऐ। माता दुर्गा दुष्टें दा विनाश करिए जगत उप्पर दया करदी ऐ। (दो आदमी हफे दे प्रवेश करदे न।)

आदमी : (किट्टे बोलदे न।) मां बैश्नो जी दी जै। देवी जी तुं'दी सदा गै जै होऐ। तुसैं गी साढ़ा प्रणाम ऐ। तुं'दी सदा गै जै होऐ। बोलो जै माता दी।

- सारे : (किट्टे सुरै च) जै माता दी। जै बैशनो देवी दी।
- बैशनो : हे भूलोकबासिओ! केह गल्ल ऐ ? तुस इन्नें घाबरे दे की ओ ??
- आदमी-1 : देवी जी, अस बरबाद होई गे आं। बड़ा अनर्थ होई गेआ ऐ।
- आदमी-2 : देवी जी! साढ़े नै बड़ी माड़ी होई ऐ।
- बैशनो : (मिट्टी गलानी च) कैसे अनर्थ होआ र दा ऐ ?? अपनी गल्लै गी सपष्ट करिए सुनाओ।
- आदमी-1 : (हफे दे) उ'नें पापिएं ...? उ'नें दुष्टें...???
- बैशनो : कु'न पापी...? कु'न दुष्ट...??
- आदमी-2 : (घाबरे दे) देवी जी महिशासुर दे दानवें साढ़े घर-कोठे फूकी दिते न। पक्की दियां फसलां तैहस-नैहस करी दितियां न। इ'नें राखशें सारे सर ते तलाऽ बी जरीले करी दिते न। धरती पर त्राहि-त्राहि मची दी ऐ।
- आदमी-1 : हां देवेश्वरी! धरती पर बड़ा अत्याचार होआ र दा ऐ। एह असुरलोक साढ़ी कुड़िएं, जनानियें दा बलपूर्वक अपहरण करी लेई जा दे न। साढ़ी ते साढ़े परिवार दी रक्खेआ करो। साढ़ी मान-मर्यादा दी रक्खेआ करो। पूरी मनुक्ख जाति दी रक्खेआ करो। रक्खेआ करो, देवी, रक्खेआ करो ॥ हूँ... हूँ... (डुसकन लगी पोंदा ऐ।)
- आदमी-2 : हां, देवी मां, असें गी इ'नें असुरलोकें शा बचाओ। इ'नें दानवें साढ़ा जीना, मरना सब गै औखा करी छोड़ेआ ऐ।
(उस्सै बेल्लै दो रिशी बी प्रवेश करदे न।)
- रिशी-1 : देवी मां! असें गी बचाओ।

- रिशी-2 : देवी मां! साढ़ी रक्खेआ करो।
- रिशी-1 : देवी मां! हून तुस्सै साढ़ा स्हार ओ। साढ़ी सारें दी रक्खेआ करो।
- बैशनो : हे रिशिओ! ऐसा केढ़ा संकट आई गोआ ऐ ?
- रिशी-2 : देवी जी, एह दानवलोक साढ़ा कोई बी यज्ञ संपूर्ण नेई होन देऐ करदे। इ'नें केई रिशी-मुनि मारी दिते न। साढ़े केई आश्रम जुआड़ी दिते न। एह दुष्ट साढ़े धार्मक कम्में च बिघन पा र दे न। इ'दे डरै कारण केई रिशी-मुनि धरती पर दर-ब-दर भड़कै दे न। महिशासुर ने सारें देवतें गी हराइऐ सुर्गे दा संघासन बी खुस्सी लेआ ऐ। एह दानव निहत्थें ते निरबल लोके गी मारै दे न, सता करदे न। पूरी धरती पर अफरा-तफरी मची दी ऐ।
- रिशी-1 : हे जगजननी! साढ़ी रक्खेआ करो। पापिएं दा नाश करो। पूरे विश्व दी रक्खेआ करो देवी।
- आदमी-1 : देवी जी, दानवें दे अत्याचार कारण मनुक्ख ते केह पशू-पखेरू बी घबराई गेदे न। देवी जी, कोई उपाऽ करो। बचाओ। साढ़ी रक्खेआ करो॥
- बैशनो : ओह, एह गल्ल ऐ ? महिशासुर इ'न्ना बड़्डा अत्याचारी असुर ऐ...? लगदा ऐ उसदी बुद्धि भ्रष्ट होई गेदी ऐ। पर, हे भूलोकवासिओ! घबराने दी कोई लोड़ नेई। थोहड़ा जेहा धीरज रक्खो, सब ठीक होई जाग।
- आदमी-2 : देवी जी! साढ़ा धीरज दिक्खी गै ते इ'नें राखशें दा हौंसला बधै करदा ऐ।
- बैशनो : थोहड़ै चिर होर सबर करो भक्तो। इ'नें दानवें क'नै निब्बड़ने लेई किश सोच-बचार करने पौना ऐ।

- आदमी-1 : देवी जी! इत्थें तौले गै किश करने दी लोड़ ऐ। इंदे अत्याचार करी सारी लुकाई च अफरा-तफरी फैली दी ऐ। कुसै गी बी नां रत्ती भर अराम ऐ ते नां मासा नींदर ऐ। महिशासुर दा नांऽ लैंदे गै जयानें, स्यानें दे साह सुकी जंदे न। हे देवी! असें गी इंदे अत्याचार कोला बचाओ। बचाओ! बचाओ!!
- रिशी-1 : देवी मां! तुस्सै इस विश्व ब्रह्मांड गी धारण करदी ओ। थुहाड़े थमां गै जगत दी उत्पत्ति होंदी ऐ। थुहाड़े थमां गै इसदा पालन होंदा ऐ ते म्हेशां तुस्सै कल्प दे अंत च सारें गी अपना ग्राह बनाई लैंदी ओ।
- रिशी-2 : हे जगजननी! तुस्सै त्रों गेणें गी उत्पन्न करने आहली सब दी प्रकृती ओ। कालरात्रि, महारात्रि ते मोहरात्रि बी तुस्सै ओ। देवी जी! तुस ते सब जानी-जान ओ।
- आदमी-2 : देवी जी! इत्थें तौले किश करने दी लोड़ ऐ; नेई तां एह दानव पूरी मानव जाति गी मारी मुकाई देंगन ते इस सन्हाकड़ी धरती गी सुन्नसान ते बंजर बनाई देंगन। एह पूरा ब्रह्मांड गै शुन्य होई जाग।
- बैश्नो : हे भूलोकबासिओ! ऐसा नेई होग। सब किश तौले गै ठीक होई जाग। चिंता करने दी कोई लोड़ नेई। बस थोहड़ा जेहा धीरज रक्खने दी लोड़ ऐ।
- आदमी-1 : पर, अंदू तगर बड़ी देर होई जाग। माहिशासुर दे सितम रोकने लेई असेंगी तौले शा तौले किश करना लोड़दा।
- बैश्नो : पर, इस समें कोई बी दि'ब्ब शक्ति दा प्रयोग करना उचत नेई होग। इस लेई, इ'नें राखसैं बरुद्ध पैहलें तुसेंगी आपूं गै लड़ने पौना ऐ।
- आदमी-2 : देवी जी,...असुरें दै बरुद्ध तौले शा तौले किश कारवाई करने दी लोड़ ऐ।

- बैश्नो : तां तौले दा उपाऽ ऐ ...एका...। सब-जने इकजुट होई जाओ।
एका बड़ी बड़्डी शक्ति ऐ।
- सारे : एका...?
- बैश्नो : हां एका...। एका लोकें दी शक्ति ऐ। थुहाड़ी अपनी शक्ति
ऐ। अपने सारे भेद-भाव भुलाइऐ इकजुट होई जाओ।
- सारे : (किट्टे सुरै च) एका ...? शक्ति ? साढ़ी अपनी शक्ति...??
- बैश्नो : हां शक्ति...। सारी जनता गी इकजुट करिऐ इस अत्याचारी
दै बरुद्ध संघर्ष करने लेई किट्टा कीता जा।
- आदमी-1 : देवी जी! एह् भोले-भाले लोक इ'नें खूंखार राखशें दा
मक्काबला कि'यां करंगन ?
- बैश्नो : एकता कनै...। भूलोकवासिओ! एकता इक ऐसी शक्ति ऐ
जिसदै अगैं बड़े-बड़े शक्तिशाली संघासन बी हिल्ली जंदे
न। बड़े-बड़े करूर राजा बी एकता दी शक्ति अगैं झुकी जंदे
न। बस थोहड़ी जेही हिम्मत ते हौंसले दी लोड़ ऐ।
- सारे : (हत्थ उप्पर चुकिऐ) साढ़ा एका...?... जिंदाबाद! सारी
जनता...? ...जिंदाबाद!! पूरी लुकाई?... जिंदावाद! देवी
शक्ति....? जिंदावाद!!
- बैश्नो : हां, सारे एका करिऐ जाओ। उ'नें दुष्टें गी मारी दूर नठाओ ॥
- आदमी-2 : आओ, एका करिऐ आओ। सारे किट्टे रल्लिऐ आओ ॥
- आदमी-1 : बोलो जैकारा शेरेंआली दा।
- सारे : जै माता दी। जै शेरेंआली माता दी ॥ (त्रै जैकारे लाइऐ चली
जंदे न।)

{द्रिश्श बदली जंदा ऐ।}

द्विश-4

(जंगल दा वातावरण। किश राखश अपने अस्त्रे-शस्त्रें नै
सुसज्जत होइए रस्ते च बैठे दे न। नशे दी हालती च, हासे-
गड़ाके च डुब्बे दे न।

राखश-1 : मित्तरो, अज्ज कोई भारू निं फसेआ।

राखश-2 : मढ़ो, भारू छोड़ी अज्ज कोई चिढ़ी बी निं फड़की।

राखश-1 : भाइया अज्ज ते सोका पेदा ऐ। सच्चें गै कोई चिढ़ी बी हत्थ
निं आई।

राखश-2 : (गड़ाका मारिऐ) झूठ...। लब्भी ते ऐ ही, पर, हत्थ निं आई।
एं हैं... हत्थ निं आई ते थूह कौड़ी। हा... हा...।

(परतिऐ हसदा ऐ, ओहदे हासे ने सारें दा हासा रली जंदा
ऐ। थोहड़े चिरै बाद लोकें दा रौला सुनचदा ऐ। 'मारो मारो'
दा रौला कोल ओंदे बझोंदा ऐ।)

लोकें दा शोर : (किट्टे सुरै च) मारो। मारो...॥

राखश-1 : (हरान होए दे) मढ़ो, एह कनेहा रौला पेदा ऐ ?

(सारें चकन्ने होई जंदे न, खड़ोइऐ अडिडयां चुक्किऐ रौले
आहलै पासै दिक्खन लगदे न।)

राखश-2 : ओह दिक्खो...(सारें दिक्खन लगदे न) एह लोकें दा जत्था
ते साढ़ै गै पासै आवै र दा ऐ। पता निं केह गल्ल ऐ...?

राखश-1 : एह ते लोकें दा समुंदर-जन ओंदा लगौ र दा ऐ।

राखश-2 : ऊं... हूँ... (डूरा भरदा ऐ) मेरा बचार ऐ जे कोई म्हत्तवपूर्ण
आदमी मरी गेआ होना ते एह सब्भै लोक उस दे नड़ोए च
शामल होए दे न। हा... हा...। (हसदा ऐ)

राखश-1 : चुप कर मूरखा। कदेँ इ'नेँ मते लोक बी कुसै दे नड़ोए च शामिल होँदे न।

राखश-2 : जा... जा... आया बड़डा अकली आला।

राखश-1 : बेवकूफो! इ'नी खलकत दिक्खो। सुट्टी दी भुंजां सरेआं निं पवै दी। एह सब्भै डांगेँ-सोटें ते अस्त्रेँ-शस्त्रेँ नै सुसज्जत होइए साढ़ै गै पासै आवै र दे न।

सारे आदमी : (किट्टे सुरै च) पकड़ो। पकड़ो॥ मारो। मारो॥ (रौला होर नेड़ै सुनचदा ऐ।)

राखश-2 : (घबराए दे) मूरखो! एह ते सिद्धा साढ़ै गै पासै आवै र दे न।

राखश-1 : कुतै असेँ गी ते निं नड़ोए भेजी देंन। ही...ही...ही...ही... (डरौना जेहा हासा हसदा ऐ।)

राखश-2 : नड़ोआ तेरा जां कोहदा...?

राखश-1 : तेरा...।

राखश-2 : मेरा निं तेरा...।

राखश-1 : साढ़े सारें दा बेवकूफो। अपना डेरा-डंडा चुक्को ते दुड़की पेई जाओ। लगदा ऐ एह सारे-जने असेँ गी गै नड़ोए भेजने लेई इत्थें आवै दे न।

(‘मारो-मारो’ दा रौला बिलकुल नेड़ै उठी ओँदा ऐ। किश आदमी ते राखश आमनै-सामनै आई जंदे न।)

आदमी : (किट्टे सुरै च) नट्टो दुष्टो, धरती छोड़ो। छोड़ो, साढ़ी धरती छोड़ो॥

अज्ज निं बचदी जान थुहाड़ी। नट्टो जेकर जान बचानी॥

राखश-1 : (बाकी राखशें पासैं संबोधत होइऐ) डटे रवो। डटे रवो॥ दिक्खी
लैनें आं केड़ा सूरमा ऐ साढ़े नै मुकाबला करने आह्ला ?

राखश-2 : एह लोक ते उस्सै बैश्नो दे समर्थक लगदे न।

राक्षश-1 : कोल आई लैन दे इ'नें सपोलें गी, इ'दे सिर धड़ै थमां बक्ख
निं कीते तां साढ़ा बी नांऽ नेई।

राखश-2 : चलो, अज्ज इ'दे खूनै गी पीने आं ते अपने ढिड्डै दी भुक्खै
गी शांत करने आं।

राक्षश-1 : दना इ'नें गी नेड़ै ते औन देओ। इक-इक गी कच्चे निं चबाया
तां साढ़ा बी नांऽ नेई।

(लोक मंच पर आई जंदे न। अपने शस्त्रें नै मारने गी
ललकारदे न।)

आदमी : (किट्टे सुरै च सुर) छोड़ो-छोड़ो। धरती छोड़ो॥ साढ़ी प्यारी
धरती छोड़ो॥

जीन देओ ते जीन सिक्खो। दुखिएं दा दुक्ख हरना सिक्खो॥
हां, दुखिएं दा दुक्ख हरना सिक्खो।

राखश : (किट्टे बोलदे न) ओए, तुस कु'न ओ...?

आदमी : (किट्टे सुर च) अस इत्थों दे बसनीक आं।

राखश-2 : तुस केह चांहदे ओ ?

आदमी-1 : अस चाहनें आं जे तुस साढ़ी सुंदर-शैल सन्हाकड़ी धरती गी
नेई जुआड़ो। असें गी इत्थें अमन-शांति कनै रौहन देओ।

आदमी-2 : तुस इस धरती गी छोड़िए पताललोक चली जाओ। असें गी
हिरख-समोध कनै इत्थें रौहन देओ। अस अमन-शांति कनै
जीना चाहनें आं।

- राखश : (किट्टे सुरै च) तुस जीना चांहदे ओ...?
- आदमी : (सारे किट्टे सुरै च) हां...हां, अस जीना चाहनें आं। अस इस धरती गी हरा-भरा ते फलदा-फुलदा दिक्खना चाहनें आं।
- राखश-1 : ...ते अस इस धरती गी जुआड़ना चाहनें आं। हा...हा...।
- राखश-2 : जित्थें होंगन भूत बलैहनें, उत्थें होंगन साढ़े ठकाने॥ हा... हा...

(ओहदे हासे कनै सारें राखशें दा हासा रली जंदा ऐ। लोक डांगां-सोटे चुक्के दे अगें-अगें बधदे न, राखश पिच्छें-पिच्छें हटदे जंदे न।)

- राखश-1 : (किश डरै दे न) भई, एह डांगा-सोटे कोहदे लेई...? एह बरछे-फरसे कोहदे लेई ??
- आदमी-1 : एह डांगा-सोटे थुहाड़े लेई। एह बरछे-फरसे थुहाड़े लेई॥
- राखश : (किट्टे सुरै च) साढ़े लेई...?
- आदमी : (किट्टे सुरै च) हां... हां... थुहाड़े लेई। थुहाड़ी खातरदारी लेई।
- राखश : (किट्टे सुरै च) ऐं ?... ऐं... हैं ??
- आदमी-2 : हां...हां... एह डांगां-सोटे, एह बरछे, फरसे सब थुहाड़े लेई। तुं'दा इऐ लाज ऐ।
- राखश-2 : पर, साढ़े पर इ'न्ना गुस्सै की ओ ? किट्टे होइऐ सारे-जने की आए ओ ??
- आदमी-1 : हां... हां... सारे-जने किट्टे होइऐ आए आं। कल्ले-दकल्ले गी ते तुस मारिए कच्चा चबाई छोड़दे ओ।

आदमी-2 : मूरखो, एह देवी जी दी आग्या ऐ जे तुसें गी इस धरती थमां
खदेड़ेआ जा। इस लेई असेंगी जो कोई बी उपाऽ करना पौग;
जरूर करगे।

आदमी-1 : तुसेंगी इत्थूं नठाइऐ गै असेंगी शांति थहोनी ऐ। इ'ऐ मां बैश्नो
दी इच्छेआ ऐ। इऐ आग्या ऐ।

राखश-1 : बैश्नो दी इच्छेआ...?

आदमी-2 : हां... हां... देवी जी दी इऐ इच्छेआ ऐ। बोलो जैकारा
शेरेंआली दा॥

आदमी : (किट्टे सुर च) मां बैश्नो जी दी जै। जै तेरी सदा गै जै होऐ॥
बोलो जै माता दी।

सारे : पापी दुष्टो, नट्टो इत्थों। जै मां शेरेंआहली दी।

(आदमी डांगा-सोटे, शस्त्र चुक्के दे राखशें दा पीछा करदे
न। राखशें च भगदड़ मची जंदी ऐ। किश नठी जंदे न। किश
मंच उप्परा ख'ल्ल डिग्गी पोंदे न। लोक फही देवी दा जैकारा
लांदे न।)

{द्रिश्श बदली जंदा ऐ।}



अंक-3

दृश्य-1

(महिशासुर दा दरबार लग्गे दा ऐ। सारे मंत्री मजूद न। दो राखश दौड़दे प्रवेश करदे न।)

राखश-1 : (घाबरे दे) महाबली असुरेश्वर दी जै। तुं'दी सदा गै जै होऐ॥ (महिशासुर दे पैरें च डिग्गी पोंदे न।)

महिशासुर : पर, तुस इ'न्ना घाबरे दे की ओ ? उ'आं सब कुशल-मंगल ते है ना...??

राखश-2 : राजन! कुशल-मंगल गै ते नेई ऐ। अस उज्जड़ी गे आं। साढ़ा सर्बनाश होई गेआ।

महिशासुर : (गरजिए) सर्बनाश...? कुस दी इ'न्नी हिम्मत...? कुस दी मौत आ'ले देआ दी ऐ ? कु'न मौती गी गलै नै लाना चांह्दा ऐ...? (गुस्से च चब्बू बटदा ऐ।)

राखश-1 : असुरेश्वर! साढ़े पर बड़ा अत्याचार होऐ र दा ऐ।

महिशासुर : अत्याचार...? कुस दी इ'न्नी मजाल ऐ जे साढ़े पासै कोई अक्ख उबड़ी चुक्किए बी दिक्खै...?

राखश-2 : राजन! अज्ज भूलोक-बासिएं किट्ठे होइऐ साढ़े पर बड़ा जोरदार आक्रमण कीता ऐ। साढ़े केई दानव योधा मारी दिन्ते गे न ते बड़े सारे घाह्ल होई गेदे न।

महिशासुर : हैं...? पर, एह साजश कुस दुष्टे नै रची ऐ ?

राखश-1 : असुरेश्वर! एह शङ्खत्र उसै बैश्नो देवी दा ऐ।

महिशासुर : ओह, एह गल्ल ऐ ?

राखश-2 : हां...राजन। एह उऐ बैश्नो ऐ जिसनै थुहाड़ा पैहलें बी नरादर कीता हा।

महिशासुर : नरादर...? (गुस्से नै घूरदा ऐ।)

राखश-3 : हां, असुरेश्वर! एह भोली-भाली लुकाई उसै दी बरगलाई दी ऐ; नेई तां इ'दे च इ'न्नी हिम्मत कुत्थें जे एह साढ़ा बरोध करन ?

महिशासुर : हूं...। (गुस्से नै चब्बू बी बटदा ऐ।) उस बैश्नो दे समर्थकें असें गी ललकारिए चंगा निं कीता। उ'नें रींगडै दे खक्खरे गी हत्थ पाया ऐ। इ'नें लोकें गी इ'न्ना पता नेई जे महिशासुर दे चलने कन्नै धरती थर-थर कंबदी ऐ। मेरे रोहै नै सर ते तलाऽ सुकी जंदे न। हवा अपना रुख मोड़ी लेंदी ऐ। मेरा नांऽ सुनदे गै जयानें-स्यानें दे साह सुकी जंदे न। (जोरें नै) क्या इ'नें लोकें गी इ'न्ना पता नेई ...?

राखश : (किट्टे सुरै च) इ'नें लोकें गी चंधी चाल्ली पता ऐ राजन।

महिशासुर : ...जे पता ऐ तां इ'दी इ'न्नी मजाल...? इस बैश्नो दे समर्थकें गी कदें बी बखशेआ निं जाग। इ'नें गी कठोर दंड दिता जाग। एह बैश्नो...? मेरी बैश्नो ?? मंत्रीश्रेष्ठ! इस बारै तु'दा केह बचार ऐ ? (अपनियां उंगलियां मरोड़दा ऐ।)

विघस : राजन! उ'आं एह बैश्नो अति सुंदर ते सुशील ऐ। थुहाड़ें संघासन दी शोभा बधाने दै योग्य ऐ।

महिशासुर : सुंदर...? सुशील...?? संघासन दी शोभा...??? हा...हा...
(जोरदार गड़ाका मारदा ऐ।)

विघस : राजन! ओह ते सुगँ दी अप्सरा लगदी ऐ।

महिशासुर : अप्सरा...? मेरी अप्सरा...?? (हा...हा...फही जोरदार हसदा ऐ।)

प्रघस : राजन! थुहाड़े संघासन दी शोभा बधाने योग्य ऐ।

महिशासुर : पर, अजें तक उसी पाने लेई मेरी हर कोशश नकाम गै रेही ऐ। उसनै केई बारी पैहलें बी मेरा नरादर कीता ऐ।

विघस : हां, सच्च गलाया असुरेश्वर, उसनै साढ़ा; मतलब थुहाड़ा म्हेशां गै नरादर कीता ऐ।

महिशासुर : मंत्रीश्रेष्ठ! इस बैशनो गी प्राप्त करने लेई कोई ठोस योजना प्रस्तुत कीती जा।

विघस : जी राजन! असें गी जरूर गै किश बचार करने पौना ऐ।

महिशासुर : मेरा बचार ऐ जे...जे... (रुकी जंदा ऐ)

प्रघस : (गल्ल पुड़छी लैदा ऐ।) तुस आदेश देओ असुरेश्वर। तुं'दे हर आदेश दा पालन कीता जाग।

महिशासुर : मंत्रीश्रेष्ठ! कोई अपना बशेश दूत भेजिए उस गी मेरा सनेहा देओ जे अ'ऊं उस कनै ब्याह रचाना चाहनां।

विघस : जी...?

मंत्री : (सारे किट्टे सुर च) ब्याह...?

महिशासुर : हां ब्याह। जेकर ओह मेरे इस प्रस्ताव गी स्वीकार नेई करै तां कुसै बल जां छल-विद्या कनै उसी मेरे तगर सुरक्खत

ढंगै नै पुजाया जा। में सच्चें गै उस कन्नै ब्याह रचाइऐ उसी
अपने संघासन दी शोभा बनाना चाहनां।

विघस : जी राजन! जो आग्या। तुं'दे इस आदेश दा पालन कीता जाग।
(मंत्री प्रघस, सेनापति ते दूत पासैं संबोधत होइऐ।) मंत्री
प्रघस, सेनापति तामर ते विद्युत्प्रभ तुस उस कोल राजन दे दूत
बनिए जाओ ते राजन दा एह प्रस्ताव बैशनो तगर पुजाओ।

त्रैवै : (किट्टे सुरै च) जो आग्या। (त्रैवै चली जंदे न।)
{द्रिश्श बदली जंदा ऐ।}

द्विःश-2

(बैश्नो देवी अंतरध्यान च लीन ऐ। अट्टे बांहिएं आहली ते शेरें दी सुआरी करने आहली, इक उच्ची चौकी पर बैठी दी ऐ। आसै-पासै केई कुमारियां खड़ोती दियां न। भेंट दे सुर सुनचदे न।)

आई गेई, आई गेई, आई गेई।

शेरें आहली मां आई गेई॥

मोहनी मूरत प्यारी-प्यारी।

भक्तें दे मन भाई गेई।

सारें पूरी होई गेई आशा॥

होई गेई सारें दूर नराशा। आई गेई ...आई गेई...॥

(रोशनी पैहले आहले स्पाट थमां बंद होई जंदी ऐ ते दूए स्पाट उपपर पौंदी ऐ। महिशासुर दा मंत्री प्रघस, सेनापति ते विद्युत्प्रभ (दूत) देवी दे नवास स्थान कोल पुज्जी जंदे न। पर, देवी दी दुआरपालका जया उ'नें गी मुख दुआर पर अगगें होइऐ मिलदी ऐ।)

जया : हे अतिथिओ! तुस कु'न ओ ते कुत्थोंआ आए ओ ?

विद्युत्प्रभ : अस महाबली असुरेशवर दे बशेश दूत आं। मैरै कन्नै मंत्री ते सेनापति बी आए दे न।

जया : देवी दे नवास स्थान पर तुं'दा सुआगत ऐ।

- प्रघस : अस तुं'दी देवी कन्नै मलाटी करना चाहें आं। राजन असुरेश्वर दा बैश्नो दे नांऽ इक बशेश सनेहा ऐ।
- जया : सनेहा ? कैसा सनेहा ऐ ??
- प्रघस : एह सनेहा बैश्नो दै नांऽ ऐ। राजन बैश्नो कन्नै ब्याह रचाना चांहदे न।
- सेवक : पर, देवी ने ते आदिकाल थमां गै सदा-सदा लेई कुमारी रौहने दा बरत धारण कीते दा ऐ। इत्थें होर बी कुमारियां हैन उं'दे चा बी तुसें गी कोई उपलब्ध नेई होई सकदी। इस आस्तै देवी कन्नै ऐसी-वैसी गल्ल करना बी उचत नेई ऐ। हे बशेश दूतो! इस लेई तुं'दे अगें नवेदन ऐ तुस देवी कन्नै मलाटी कीते बिना गै परतोई जाओ।
- प्रघस : पर, राजन दा एह प्रस्ताव बैश्नो तगर व्यक्तिगत पुजाना बड़ा जरूरी ऐ। ऐसा करने लेई असें गी राजन दा आदेश ऐ।
- जया : ठीक ऐ। आओ, देवी जी कन्नै आपूं मलाटी करी लैओ।
(रोशनी मुख स्पार्ट पर पौंदी ऐ। जया दै पिच्छें-पिच्छें दूत बी देवी कोल पुज्जी जंदे न।)
- जया : देवी जी तुं'दी सदा गै जै होऐ।
- बैश्नो : दुआरापालका केह गल्ल ऐ ? एह कु'न मैहमान आए न ??
- जया : देवी जी, एह असुरराज महिशासुर दे बशेश दूत न। तुं'दै नांऽ कोई सनेहा लेइऐ आए न।
- बैश्नो : आओ। आओ॥ मेरे नवास स्थान पर तुं'दा सारें दा सुआगत ऐ। हां, ते दस्सो माहिशासुर दा मैरे नांऽ केह सनेहा ऐ?
- प्रघस : ओह तुं'दै नै...(अटकी जंदा ऐ।)

- बैश्नो : हां..हां दस्सो ? खुल्लिए गल्ल करो।
- प्रघस : राजन असुरेश्वर ने तुं'दे नांऽ ब्याह दा प्रस्ताव भेजेआ ऐ। ओह् तुसें गी वरण करना चांहदे न।
- विद्युत्प्रभ : देवी! महाबली असुरेश्वर प्रराक्रमी, प्रतापी ते अति बुद्धिमान ऐ, महिशासुर नांऽ कनै प्रसिद्ध ऐ। ओह् महाबली युद्ध भुमि च सारे देवतें गी पराजत करी चुके दा ऐ। हून ओह् पूरी त्रैलोकी गी जित्तिए तुसें गी सौंपी देंगन। देवी! देवतें दी सैना गी लताड़ने आह्ला महाबली महिशासुर तुं'दा वरण करना चांहदा ऐ; तुसें गी अपने संघासन दी शोभा बनाना चांहदा ऐ।
- तामर : किरपा करिए एह् प्रस्ताव स्वीकार करी लैओ।
- बैश्नो : महिशासुर दा एह् बचार निंदने जोग न।
- प्रघस : एह् प्रस्ताव स्वीकार करना गै थुहाड़ी भलाई ऐ; असें गी इ'ब्बी आदेश ऐ जे सैहमती कनै गल्ल नेई बनै तां बल जां छल-विद्या दा प्रयोग करिए तुसें गी हर स्थिति च राजन तगर पुजाया जा।
- बैश्नो : मंत्रीवर! में असुरलोकें दा बध करने लेई गै इत्थें उपस्थित होई आं। महिशासुर पापी ऐ। उसदे पाप दा घड़ा लबा-लब भरौई गेदा ऐ। महिशासुर अपनी शक्ति दा दुरुपयोग करै दा ऐ। ओह् बेदोसे भूलोक-बासिएं ते देवतें पर अत्याचार करै दा ऐ। ओह्दा ऐंत तौले गै निश्चत ऐ।
- विद्युत्प्रभ : हा...हा...हा (जोरै नै हसदा ऐ।) असुरेश्वर दा ऐंत...? असंभव ? उं'दा ऐंत ते संभव गै नेई ऐ कि जे उ'नें गी अमर रौहने दा वरदान प्राप्त ऐ।
- बैश्नो : जदूं तक ब्याह दी गल्ल ऐ तां में सदा कुमारी रौहने दा बरत

धारण कीते दा ऐ। महिशासुर दा एह प्रस्ताव मिगी स्वीकार नेई ऐ।

प्रघस : तुसें गी राजन दी शक्ति दा ठीक-ठीक अनुमान नेई ऐ। असुरराज म्हान शक्तिशाली ऐ।

बैश्नो : ठीक ऐ, उस दी चुनौती मिगी स्वीकार ऐ। पर, इक शरत ऐ...?

प्रघस : कैसी शरत...?

बैश्नो : में एह प्रण पाए दा ऐ जे जो बी योधा मेरे कनै युद्ध करिऐ जित प्राप्त करग में उसी अपना वर स्वीकार करी लैंग। जाओ अपने महिशासुर गी गलाओ जे मेरे नै युद्ध करै।

तामर : पर, राजन दा असें गी आदेश ऐ जे तुसें गी बल जां छल-विद्या कनै उं'दै तगर पुजाया जा। इस लेई तुस अपनी इच्छेआ कनै चली पवो नेई तां असें गी बल जां छल-विद्या दा सहारा लैने पौना ऐ।

बैश्नो : हे दूतो! में असुरलोकें दा बध करने लेई गै इत्थें उपस्थित होई आं। इत्थुआं तौले चली जाने च गै तुं'दी भलाई ऐ; नेई तां तुसें गी इत्थें गै भस्म करी देंग।

कुमारियां : (किट्टे सुरै च) पगड़ो-पगड़ो। मारो-मारो।

सूत्रधार : देवी दियां सारी कुमारियां क्रोधत होई जंदियां न। जोरदार गरजना होंदी ऐ। मारो-मारो' दा शोर उब्भरदा ऐ। डरौना संगीत बजदा ऐ। महिशासुर दे दूत रफूचक्कर होई जंदे न। इस दै परैत परम तपस्वी मुनिवर नारद जी वीणा दे सुर छेड़दे होई आकाशमार्ग रस्तै देवी कोल पुज्जी गे। देवी गी प्रणाम करिऐ गलाया-'देवी! देवलोकें बड़े आदर कनै मिगी थुहाड़ै

कोल भेजेआ ऐ ; कि जे महिशासुर नै उ'नें सारें गी पराजत
करी दित्ते दा ऐ। इऐ नेई ओह् देत्याराज तुसें गी बी प्राप्त
करने आस्तै प्रयत्नशील ऐ। देवी! अ'ऊं देवतें दी एह् गल्ल
दस्सन आयां जे तुस डटिऐ उस देत्य कनै युद्ध करिऐ उस
दा बध करी देओ। उसदे बध च गै सारें दी भलाई ऐ।
नारायण! नारायण!!' आक्खिऐ कुतै होर पासै चली गे।
(रोशनी बंद होई जंदी ऐ।

{द्रिश्श बदली जंदा ऐ।}

द्रिश्श-3

(पैहलें आह्ला (अंक-2 द्रिश्श-1) द्रिश्श। महिशासुर दा दरबार लगगे दा ऐ। महिशासुर परेशानी दी परिस्थिति च इद्धर-उद्धर फिरै दा ऐ। दो अंगरक्षक बी ओह्दै पिच्छें-पिच्छें चैहल-कदमी करै दे न। किश दरबारी खड़ोते दे न। महिशासुर कदें उं'दे मूहें गी ते ओह् ओह्दे मुहें गी तक्कै दे न। मंत्री प्रघस, सेनापति ते दूत हफे दे तौले-तौले प्रवेश करदे न।)

प्रघस : (प्रवेश करदे गै) महाबली असुरेश्वर दी जै। घोर अनर्थ। घोर अनर्थ होइया। राजन, साढे नै बड़ी माड़ी होई ऐ।

महिशासुर : हैं...? उ'आं खैर ते एह् ऐ ना...??

तामर : असुरेश्वर! मसोआं जान बचाइए नट्टे आं। उ'नें दुष्टें ते असें गी जान्नों मारना लाया हा। राजन! साढ़ी बड़ी भारी सैना दा संहार करी दित्ता गेआ ऐ।

महिशासुर : ओह्दी इ'न्नी हिम्मत...? ओह्दी इ'न्नी मजाल...??

प्रघस : राजन! बैश्नो दी कुमारियें चौन्नें पासेआ घेरिऐ साढ़े दानव योधें गी मारियै नठाई दित्ता ऐ। साढ़े पर आक्रमण कीता ऐ ते उस बैश्नो नै तुसंगी बी अपशब्द बोले न।

महिशासुर : हूं ? (अपने हथ मरोड़दा ऐ ते कचिचीयां बटदा ऐ। गुस्से च बोलदा ऐ।)

उसनै मेरे बशेश दूतें समेत पूरी सैना दा अपमान कीता ऐ ?

उं 'दै पर हत्थ चुक्केआ ऐ ?? लगदा ऐ उसगी बी फंग लग्गी
गेदे न। पर, अजें तगर उसी मेरी शक्ति दा ग्यान नेई। इक्के
फूक्के नै लोहा, पत्थर सब भस्म करी देंग।

प्रघस : राजन! उसनै थुहाड़ा उसी वरणे दा प्रस्ताव बी सिरें दा ठुकराई
दित्ता ऐ।

तामर : ...ते उस युद्ध करने लेई तुसेंगी ललकार दित्ती ऐ। उस गलाया
ऐ जे कुसै च शक्ति है तां उस कन्नै युद्ध करै।

प्रघस : हां... उस इ 'ब्बी गलाया ऐ जे ओह तुं 'दी शक्ति दा ऐंत करी
देग।

महिशासुर : (गुस्से च) ...ऐंत...? ऐंत मेरा नेई ; ऐंत तां उस दा
होग...हा...हा...(गुस्से च हसदा ऐ।)

तामर : असुरेश्वर! रोहै कन्नै संबोधन करदे होई असें गी उस पापी
ते दुष्ट बी गलाया ऐ।

महिशासुर : (गुस्से नै) ओहदी इ 'न्नी हिम्मत... जे ओह मेरी शक्ति गी
ललकारै ? बड़े-बड़े बलशाली योधा, सारे देव-देवता मेरै
अगँ नतमस्तक होई गेदे न। इसलै सुरगै दा संघासन बी मेरै
कोल ऐ। एह बैशनो केह चीज ऐ...? इसी इक्के फूक्के नै भस्म
करी देंग।

तामर : राजन! उसनै थुहाड़ा बड़ा नरादर कीता ऐ ते बड़े कौड़े शब्द
बी बोल्ले न।

महिशासुर : मंत्रीश्रेष्ठ...?

विघस : जी राजन!

महिशासुर : उस बैशनो गी प्राप्त करने लई कोई होर ठोस योजना प्रस्तुत
कीती जा।

विघस : राजन! ओहदे उत्साह थमां पता चलदा ऐ जे ओह कोई सधारण नारी नेई ऐ।

महिशासुर : (होर गुस्से च) जेकर तुस सारे-जने समर्थ नेई ऐ ओ तां मिगी आपूं गै किश हीला करना पौना ऐ। प्रघस, विघस, शंकुकर्ण, विभवसु, विधुमाली, सुमाली, पर्जन्या ते करूर मेरे अट्ट मंत्री न ते एह सब्भै शूरवीर ते नीतिमान न। क्या मेरे सारे मंत्री एह कम्म करने लेई समर्थ नेई हैन ?

विघस : राजन! कुसै योजना दै तैहत् उसी इत्थुआं नठाने गै पौना ऐ।

महिशासुर : मंत्रीश्रेष्ठ! उसी नठाना नेई ऐ। उसी ते वरियै लेऔना ऐ। ओह ते मेरे दिलै च बस्सी गेदी ऐ। जदूं दी ओहदे रंग-रूपै दी चरचा सुनी दी ऐ मेरे दिलै च इक तूफान-जन झुल्लै दा ऐ, दिलै च खौ'दल-जन मची दी ऐ। दिन-रात उसै दे सुखने दिक्खै करनां। एह बैश्नो कदूं प्राप्त होग ते कदूं मेरी आत्मा गी शांति मिलग।

तामर : असुरेश्वर! ओह साढ़ा सर्वनाश करने गी लग्गी दी ऐ। उसदे शारे पर गै ते साढ़े सेनापति असिलोमा समेत केई बड़े-बड़े योधा मारी दिते गे न। उसदी कुमारियें ते ओहदे समर्थके साढ़े केई क्षेत्र अपने नियंत्रण च करी लैते न। ऐसी नारी कनै ब्याह करना उचित नेई ऐ। राजन! एह नारी थुहाड़ी सत्ता लेई इक्क बड़्हा संकट बनी सकदी ऐ।

महिशासुर : (जोरै नै) सेनापति तामर...?

तामर : (हौले जे सुरै च) जी असुरेश्वर।

महिशासुर : सेनापति, तुगी मेरे दिलै दी पीड़ा दा दना बी एहसास नेई। मेरे सीने च उसी प्राप्त करने दी अग्ग-जन लग्गी दी ऐ।

आह...(लम्मा साह भरदा ऐ) कदूं मैरै दिलै दे अरमान पूरे
होंगन...? बैश्नो... हा... हा... मेरी बैश्नो। (हसदा ऐ)

प्रघस : राजन! बैश्नो इसलै शतश्रृंग फ्हाड़ै दी त्रिकूट टीसी पर अपने
नवास स्थान पर उपस्थित ऐ।

तामर : असेंगी त्यारी करिऐ उस दा पीछा करना चाहिदा।

विघस : हां, असुरेश्वर! उस बैश्नो नै असेंगी युद्ध लेई ललकार दिती
ऐ। असेंगी इससै बेल्लै आक्रमण करना लोड़दा ऐ।

महिशासुर : हूं... (डूरा भरदा ऐ।) ओह ते मेरा लक्श ऐ। सिर्फ मेरा।
चलो सैना त्यार करो।

तामर : सैना बिलकुल त्यार ऐ, सिर्फ तुं'दे आदेश दा इंतजार ऐ
राजन।

बिडाल : बोलो महाबली राजन दी...।

राक्षस : (किट्टे सुरै) जै। जै॥ महाबली राजन दी...जै...॥

{द्विश्र बदली जंदा ऐ।}

द्विश-4

(नगाड़ा, सैंख ते होर केई प्रकार दे करकश साजें दे संगीत दी गूंज। महिशासुर दी सैना बरछे-फरसे चुक्के दे ते केई अस्त्रें-शस्त्रें नै सुसज्जत होइए देवी दे नवास दै बाहर तगर पुज्जी जंदे न। रोशनी पैहले स्याट पर पौंदी ऐ। देवी दी दुआरपालका जया आश्रम दै बाहर गै खड़ोती दी ऐ।)

महिशासुर : (गुस्सै नै) तूं कु'न ऐ ओए...?

जया : पैहलें तुस अपना परिचे देओ, तुस कु'न ओ ?

महिशासुर : (परतिऐ) अ'ऊं पुच्छा ना तूं कु'न ऐ ओए...??

जया : में देवी जी दी दुआरपालका जया आं।

महिशासुर : कुत्थें गई ऐ देवी तेरी...? अ'ऊं उस कनै मलाटी करना चाहनां।

जया : पर, इ'न्नी सैना लेइऐ कैसी मलाटी ? ओबी इ'न्नें अस्त्रें-शस्त्रें नै सुसज्जत होइऐ ?

महिशासुर : हां, अ'ऊं उस कनै इ'यां गै मलाटी करना चाहनां।

जया : पर, देवी जी ते इसलै अपने अंतरध्यान च लीन ऐ। तुसंगी देवी नै मलाटी करने लेई थोहड़ा जेहा बलगने पौना ऐ।

महिशासुर : ओ मूरखे, अस दर्शन करन निं आए; दर्शन करान आए आं।

जया : जी! पर, तुस कु'न ओ ?

- महिशासुर : अ'ऊं आं सब शा शक्तिशाली ... महाबली असुरेश्वर
महिशासुर...। महिशासुर नां५ ऐ मेरा। हा...हा... (हसदा ऐ)
- जया : (घाबरे दे) असुरेश्वर महिशासुर...?
- महिशासुर : हां, महाबली महिशासुर। तेरी देवी ने मेरा नरादर कीता ऐ।
उसनै मेरी सत्ता ते शक्ति गी ललकारेआ ऐ ते मेरे बशेश दूतें
दा अपमान बी कीता ऐ। उसनै मेरा ब्याह् दा प्रस्ताव ठुकराईऐ
मेरा नरादर कीता ऐ। उसदा एह् अपराध क्षमा दै जोग नेई ऐ।
- जया : पर, देवी जी लेई ते सब्भै प्राणी इक्कै बरोबर न। देवी जी
कदें कुसै दा नरादर नेई करदियां। उलटा तुं'दे बशेश दूतें देवी
जी गी अपशब्द बोले हे। इस्सै लेई देवी जी नै उ'नें गी इत्थों
चली जाने लेई किश कठोर शब्दें दा प्रयोग कीता हा।
- महिशासुर : कठोर शब्द...? ओह् बी मेरै बरुद्ध-?? उसी बड़े कठोर शब्द
बोलने औंदे न ? जा जाइऐ अपनी देवी गी बोल जे बाहर
निकलै। जरा झत्त होई जा तुं'दी देवी रानी कनै।
- जया : जी में तुसेंगी पैहलें गै गलाया ऐ जे देवी जी इसलै अपनी
भक्ति च लीन ऐ। इसलै उं'दे ध्यान च बिघन पाना ठीक नेई
होग।
- महिशासुर : (धक्का मारदा ऐ) परें हट मूरखे, जे ओह् बाहर निं आई
सकदी तां अस अंदर चलने आं।
- जया : (अड़ी जंदी ऐ) नेई, में तुसें गी कदें बी अंदर प्रवेश नेई करन
देंग।
- महिशासुर : (परती धक्का मारदा ऐ) जा परें हट ओए। ऐहमें गै मारे
जागी।
- जया : नेई..., मेरे जींदे जी तुस अंदर प्रवेश नेई करी सकदे।

महिशासुर : ...ते तेरे मोए दे ते अंदर प्रवेश करी सकने आं। हा...हा।
(किश राखश अपने अस्त्र-शस्त्र सिद्धे करी लेंदे न।)

महिशासुर : अ'ऊं आक्खा नां परें हटी जा नेई तां ऐहमें गै मुखतै च मारे जागी।

जया : में अपने जींदे जी तुसेंगी कदें बी अंदर प्रवेश नेई करन देंग।

राखश-1 : ...ते तेरे मोए दे ते अंदर प्रवेश करी गै सकने आं।

महिशासुर : बड़ा चिड़-चिड़ करै दी ऐ। (राखशें पासैं मुखातब होइऐ)
मारो इस गी। कुसले दा डड्डुंऐ आंहगर टर्-टर् करी जा र दी ऐ।

(राखश मारने दी मुद्रा च होंदे न, जया दुआरपालका चीख मारिऐ ढेर होई जंदी ऐ।)

महिशासुर : चलो इसदी टैंटा ते मुक्की। साढ़े रस्ते च खाह-मखाह दा रोड़ा बनी दी ही। आई बड़्डी देवी दी भक्ता।

(महिशासुर ते बाकी राखश ओहदी लोथै उप्परें लंधिऐ अगें बधी जंदे न। रोशनी इस स्पाट थमां बंद होई जंदी ऐ। मुख स्पाट पर पोंदी ऐ। देवी दी होर सेवकां/कुमारियां मंच पर दौड़ै दियां न। राखश बरछें चुक्के दे उं'दैं पिच्छें-पिच्छें दौड़ै दे न। बाद च देवी बैश्नो ते उसदी इक होर सेवका मंच पर आई जंदियां न।)

सेवका : बचाओ! बचाओ!! देवी बचाओ! साढ़ी सारें दी रक्खेआ करो।

बैश्नो : सेवका घबराओ नेई। सब ठीक होई जाग। डरने दी कोई लोड़ नेई ऐ। थोहड़ी हिम्मत रक्खो, धीरज बनाई रक्खो।

राखश : (किट्टे सुरै च) पगड़ो! पगड़ो!! मारो! मारो!!

मां बैश्नो/78

सूत्रधार : उस बेल्लै देवी ने बी सारी कुमारियें गी गलाया जे तुस सब्भै परम पराक्रमी कुमारियां मेरी आग्या कन्नै भयंकर रूप धरण करिऐ ढाल, तलवार, धनश, बगैरा अपने अस्त्र-शस्त्रें नै सुसज्जत होई जाओ। देवी दी आग्या लेइऐ सब्भै कुमारियां असुरें दा सहांर करने लेई युद्ध च डटी गेइयां। उसदै परैंत देवी दी कुमारिएं ते दानवें बश्कार बड़ा घमासन युद्ध छिड़ी गेआ। उ'नैं कुमारियें दे प्रयास कन्नै असुरें दी चतुरंगिणी सैना घड़ी पलै च गै नश्ट होई गेई। केइएं दानवें दे सिर कटोइऐ धरती पर डिगगी पे। चिक्षुर, असिलोमा, महाहनु, बाष्कल, परिवारित, चामर, चिक्षुर समेत बड़े-बड़े देत्य सेनापति मारे गे। इस चाल्ली थोहड़े चिरै बाद गै बाकी बचे दे पापबुद्धि असुरलोक युद्ध भुमि थमां नठदे होए। जिस थां युद्ध होआ उत्थों दी धरती पर इ'न्ना जैदा रक्तपात होआ जे थोहड़े चिरै बाद उत्थें खूनै दी नदियां बगन लगन पेइयां। देवी नै घड़ी पलै च गै असुरें दी बड़ी भारी सैना गी नश्ट करी दिता। बाकी दैत्य जखमी हालत च जान बचाइऐ नठे ते महिशासुर कोल पुज्जी गे। देवतागण बड़े खुश होए ते देवी उप्पर बड़े प्रसन्न होइऐ आकाश थमां फुल्लें दी बरखा बरहान लगे। महिशासुर दी सैना च हा... हाकार मची गेआ। थोहड़े चिरै बाद देवी ते महिशासुर आमनै-सामनै आई जंदे न।

बैश्नो : हे महाबली दैतराज! रुकी जा...। में आखा निंआं रुकी जा...नेई तां ठीक नेई होग। अपने दूशत बचार त्यागी दे।

महिशासुर : हे देवी! एह जगत परिवर्तनशील ऐ। स्त्री, पुरुश जो बी इत्थें रौंहदे न, सारें दे मनै च हर चाल्ली दे सुख भोगने दी इच्छा बनी दी रौंहदी ऐ। इंद्र समेत सारे देवता युद्ध च मेरे थमां हारी चुके दे न। मेरे राजमैहल च जिन्ने बी दि'ब्ब रत्न हैन उं'दा

सारें दा उपयोग करना तुगी सुलभ होग। सुंदरी! हून तुस मेरी पटरानी बनने दा प्रस्ताव स्वीकार करो।

बैश्नो : मूरख! तूं पताललोक चली जा। नेई तां मैरै कनै युद्ध कर। तुगी मारने दै परैंत तेरे सारें असुरें गी मारिऐ गै भिगी सुख दी प्राप्ती होग।

महिशासुर : मतलब मेरा प्रस्ताव स्वीकार नेई ऐ...?

बैश्नो : महाबली महीशासुर! जदू-जदू सैंतें, पुरशें जां लुकाई गी कोई कष्ट पुजदा ऐ, अदू-अदू उं'दी रक्खेआ करने लेई में देह धारण करिऐ प्रगट होई जर्नीं आं।

महिशासुर : मतलब, मेरा प्रस्ताव स्वीकार नेई ऐ।

बैश्नो : तेरा प्रस्ताव निंदने योग्य ऐ।

(महिशासुर हत्थें च बक्ख-बक्ख शस्त्र घुमांदा ऐ।)

महिशासुर : हा...हा...। (हसदा ऐ) अज्ज तुगी मेरे कशा कोई निं बचाई निं सकदा। हा...हा...।

कोई निं बचाई सकदा। कोई देवता बी नेई। इंद्र बी नेई..., ब्रह्मा बी नेई...; कोई बी नेई कि जे उं'दे सारें पर में पैहलें गै बिजे प्राप्त करी लेदी ऐ।

(होर अगैं बधदा ऐ) आ... आ... मैरै कोल ते आ...।

बैश्नो : अ'ऊं आक्खा निंआ रुकी जा, नेई तां ठीक नेई होग।

(महिशासुर देवी पासै अगैं बधदा ऐ, देवी पिच्छें-पिच्छें हटदी जंदी ऐ। देवी उप्परा रोशनी इकदम बंद होई जंदी ऐ। हून रोशनी सिर्फ महिशासुर पर पौंदी ऐ। ओह न्हरे च तलोफां मारै दा ऐ।)

महिशासुर : एह कुद्धर छपन होई गेई ऐ भई। क्या एह कोई छल-विद्या ऐ। कमाल ऐ भई।

(महिशासुर आहले स्पाट थमां रोशनी बंद होई जंदी ऐ।
रोशनी सिर्फ देवी पर पौंदी ऐ। देवी उप्पर अंबरै पासै दिखदे
होई हत्थ जौले करदी ऐ।)

बैश्नो : हे महाशक्तिओ! एह दानव अपने मान थमां डिगगी चुके दा
ऐ ते अति नीचता उप्पर उतरी आए दा ऐ। में अपने हत्थें गी
इसदे खूनै कनै रंगनां नेई चाहदी। इस समें मिगी स्हेई निरणे
करने दी प्रेरणा देओ।

अकाशवाणी : हे देवी बैश्नो! तेरी सदा गै जै-जै होऐ। देवी एह तुं'दी
परीख्या दा समें ऐ। इस समें तुसें आपूं सोच्चिऐ स्हेई निरणे
लैना ऐ। महिशासुर दा बध करने लेई एह उचित समें ऐ। इस
लेई तुसेंगी आपूं उचित निरणा करना होग। देवी तुं'दी उत्पत्ति
दा मुख कारण इऐ हा जे तुस दानवें दे अत्याचार गी मटाइऐ
इस स्रिष्टी पर धरम गी स्थापत करो। लुकाई दी सुख-शंति
गी ब्हाल करो। देवतें दी पदविएं ते उंदे मान सम्मान गी ब्हाल
करो। इस पापी दा बध करने च कोई पाप नेई ऐ; सगुआं
समूची स्रिष्टी दा भला होग। सारे देवते तुं'दी जै-जै करंगनं।
देवी! सब दा भला करो। सब दी रक्खेआ करो। इस दुष्ट
दा बध सिर्फ तुं'दे गै हत्थें संभव ऐ। एह कम्म करना तुं'दा
मुख करतब्ब ऐ। अपना करतब्ब नभाओ देवी। अपना करतब्ब
नभाओ।

बैश्नो : हे महाशक्तिओ! जैसी तुं'दी आग्या बैसा गै होग।

(देवी हत्थ जौले करदी ऐ। इस स्पाट थमां रोशनी बंद होई
जंदी ऐ ते पैहलें आहले स्पाट पर पौंदी ऐ। महिशासुर ते देवी
फिरी आमनै-सामनै आई जंदे न। बड़ा घोर युद्ध शुरू होई

मां बैश्नो/81

जंदा ऐ। दोऐ बक्ख-बक्ख घातक शस्त्रें दा प्रयोग इक दुए पर करदे न। डरौना संगीत बजदा ऐ।)

महिशासुर : हूं...हूं...। बैश्नो हा... हा ॥ तूं कुत्थें छपन होई गेदी ही ? तूं जित्थें बी जाएं अज्ज तुगी मेरे कशा कोई बी निं बचाई सकदा।

बैश्नो : महाबली महिशासुर! जेकर तुगी अपनी भलाई चाही दी ऐ तां सारें असुरें समेत पताललोक चली जा। नेई तां परिणाम ठीक नेई होग।

महिशासुर : नेई तां केहू होग भला...?

बैश्नो : नेई तां तेरा सर्बनाश करी देंग।

महिशासुर : सर्बनाश... ? हा... हा...। (हसदा ऐ) सर्बनाश...मेरा...?? बड्डी आई सर्बनाश करने आहली। तूं मेरा किश निं बगाड़ी सकदी। मिगी ते नेई मरने दा वरदान प्राप्त ऐ। अ'ऊं अमर आं। अ'ऊं अमर आं... हा...हा... (हसदा ऐ)

बैश्नो : महिशासुर! एह अंबर, एह धरती तेरे उपद्रव कारण रोऐ, तड़फै दे न। किश सोच। किश रैहम खा। इस भूलोक ते सुर्गलोक गी छोड़िऐ पताललोक चली जा।

महिशासुर : जा...जा...बड्डी आई उपदेश देने आली। तुगी मेरी शक्ति दा दना बी ग्यान नेई ऐ।

बैश्नो : महाबली, तूं अपनी शक्ति दा दुरुपयोग करै ना ऐं। तुगी तेरे घमंड नै अन्नां करी दित्ते दा ऐ। इस्सै कारण तुगी अच्छाई-बुराई दा किश ग्यान निं होऐ करदा ऐ।

(बक्ख-बक्ख शस्त्रें नै इक दुए पर हमला करदे न। महिशासुर अगैं-अगैं बधदा ऐ ते देवी पिच्छें-पिच्छें हटदी जंदी ऐ।)

बैश्नो : में आक्खा निंआ रुकी जा। उत्थें गै रुकी जा नेई तां ठीक नेई होग।

महिशासुर : (नाटकिए ढंगें नै) आ...आ...। आ मेरै कोल ते आ॥

बैश्नो : दुष्ट पापिआ, उत्थें गै रुकी जा जित्थें तूं ऐं। (देवी थोहड़ा पिच्छें हटदी ऐ।)

महिशासुर : (अगें बधदे होई) अपने असुरेश्वर गी जो मरजी आखी लै। मेरे ब्याह दा प्रस्ताव ठुकराइऐ तूं चंगा निं कीता। (लम्मा साह भरदा ऐ) आ...हा... कदूं दे सुखने लै दा हा तुगी प्राप्त करने लेई। लगदा ऐ हून मेरी इच्छेआ पूरी होने आहली ऐ। वाह! क्या रंग, क्या रूप ऐ तेरा ? जैसा सुनेआ हा उस कोला बी मता सुंदर ऐ। मुखड़े पर आखो सूरज दी किरणें दा प्रकाश खिल्लरे दा होऐ॥ क्या जादूं ऐ तेरे रंग-रूपै दा। इक बारी मेरा ब्याह दा प्रस्ताव ते स्वीकार करी लै ते मेरे संघासन दी शोभा बनी जा। मेरा राजपाठ सब तेरा होई जाग। (बल्लें-बल्लें अगें-अगें बधदा ऐ।)

बैश्नो : (पिच्छें-पिच्छें हटदी ऐ) महावली असुरेश्वर! अ'ऊं आखा निआं अगें बधने थमां रुकी जा। अपने दूशत बचार त्यागी दे। जेकर मेरै नेडै आया तां ठीक नेई होग।

महिशासुर : चंगा होग जां माड़ा होग ; अज्ज जो बी होग सै होन गै दे। जरा अपने कोल औन ते दे।

बैश्नो : हे असुरराज! अपने गंदे बचार त्यागी दे; नेई तां चंगा निं होग।

महिशासुर : बचार ते मेरे नेक न, पर, तेरी सैहमती दी लोड़ ऐ। हा...हा...हा...(जोरदार हसदा ऐ। पही अगें बधदा ऐ।) चलो तेरी सैहमती दे बिना गै कम्म चलाई लैने आं। हा...हा...हा...। (पागलें आंहगर हसदा ऐ)

बैश्नो : महिशासुर बाज आई जा। एह मेरी तुगी खीरी चेतावनी ऐ।
 महिशासुर : जा जा...? आई बड़्डी चेतावनी देने आली। (होर अगँ बधदा ऐ)

तेरे श्रीअंगें ऐ शोभा नराली ॥

तेरे सुखनें ऐ नींदर लुट्टी।

भुक्ख, त्रेह ऐ मेरी मुक्की ॥

चाह मनै अज्ज होंगन पूरे।

सब सुखने मेरे होंगन पूरे ॥

(देवी विकराल रूपै च आई जंदी ऐ। हत्थें च त्रिशूल, तलवार, गुरज ते केई होर अस्त्र-शस्त्र लेते दे न। देवी तलवार चुक्किऐ मारने दी मुद्रा च होंदी ऐ।)

बैश्नो : तेरे बी दिन होए हून पूरे। हून तेरा अत्याचार झल्लना कुसै निं। न्हेरा सारा मेटी देना। तेरा संघासन पुट्टी देना। (महिशासुर नठदा ऐ।)

सूत्रधार : देवी महिशासुर दा पीछा करदी ऐ। महिशासुर दे प्रमुख सैनापतिएं तामर, वाष्कल, दुर्मुख, चिक्षुर, असिलोमा बगैरा केई असुरें दा बध करिऐ देवी जिसलै महिशासुर पासै अगँ बधी तां बड़ा घमसान युद्ध शुरू होआ। इस युद्ध च इ'न्नै जैदा असुर मारे गे जे दिक्खिऐ महिशासुर दा कलेजा बी कम्बी उट्टेआ। उस गुस्से च आइऐ अपने गुरजै दी इक सट्ट देवी दे शैरै दे मत्थै पर मारी दिती। शेर बी उसी मारने लेई उस पासै दौड़ी पेआ। महिशासुर अपना रंग-रूप बटाइऐ युद्ध करन लागी पेया। दिक्खिऐ देवी गी बड़ा गुस्सा आया। महिशासुर त्रिकूट घाटी आहलै पासै नट्टा। नठदे-नठदे जिसलै ओह शतश्रृंग फ्हाड़ै पर पुज्जा तां देवी बी उत्थें पुज्जी गेई। उत्थें देवी ने उसी पैरें थल्लै दबाइऐ त्रिशूलै कनै मारी दिता। तलवारी कनै सिर कट्टिऐ धड़ै थमां बक्ख

करी दित्ता। कटोए दे सिरै गी देवी ने त्रिशूलै दी चुंजै उप्पर
चुक्किए घुमांदे होई दूर फ्हाड़ै पर सुट्टी दित्ता।

इक्क जोरदार धमाके दी बाज ओँदी ऐ। करलाने दी बाज
ओँदी ऐ। महिशासुर दा धड़ पुंजा डिग्गी पौँदा ऐ। उप्परा दा
फुल्लें दी बरखा होँदी ऐ। शैल संगीत उब्भरदा ऐ, फुल्लें दी
बरखा होँदी ऐ।

सारे : जै-जै देवी तेरी सदा गै जै होऐ।

(ऊं... दा संगीत दा सुर उब्भरदा ऐ)

अकाशवाणी : जै! जै!! जै!!! देवी जी, तुं'दी सदा गै जै होऐ। सारे देवता
इसलै तुं'दी जै-जै करै दे न। तुं'दे उप्पर फुल्लें दी बरखा करै
दे न। अज्ज इस धरती दा भार किश हौला होआ ऐ। आह!
कि'न्ना सुख बझोऐ करदा ऐ। बाहू च मिट्ठा-मिट्ठा संगीत
गूंजन लगा ऐ। चमुखै सुंदर-सुंदर द्रिश्श नजरी औन लगे न।
सूरजै दियां किरणां बी कि'न्नियां सुंदर चमकन लगियां न।
कि'न्ना सुहाना वातावरण बनेआ ऐ। सुखै नै पक्खरू-पक्खरू
बी चैहकन लगे न। लोकें दे मुखडें पर खुशी ते सुख-शांति
नजरी औन लगी ऐ। हे वैष्णवी! सारे देवते नतमस्तक होइऐ
तुसैं गी प्रणाम करै दे न।

(सारे देवता देवी कोल मंच पर पुज्जी जंदे न।)

सारे : (किट्टे सुरै च) जै! जै!! जै!!! देवी तुं'दी सदा गै जै होऐ॥

बैश्नो : हे महाशक्तिओ! असुरेश्वर महिशासुर दा बध में तुं'दी प्ररेणा
कनै ते तुं'दी इच्छेआ अनुसार करी दित्ता ऐ।

सारे देवते : जै-जै। देवी तुं'दी सदा जै होऐ।

(देवी महिशासुर कोल जंदी ऐ, ओह सैहका दा ऐ।)

महिशासुर : हाय...हाय...। (तड़फै करदा ऐ)

बैश्नो : हे महाबली असुरेश्वर! में हर संभव प्रयत्न कीता जे तू अपने दूशत बचारें गी त्यागी दें, पर, तूं पाप ते अत्याचार दा मार्ग त्यागी निं सकेआ। शैद बिधाता नै तेरी मौत मेरे गै हत्थें लिखी दी ही, इस लेई तूं मेरे गै हत्थें सुर्गे गी प्राप्त होआं ऐं।

(महिशासुर बल्लें-बल्लें अक्खीं खो'लने दी कोशश करदा ऐ।)

महिशासुर : (भरी दी गलानी च) हे देवी! मेरा तुसैं गी खीरी प्रणाम ऐ। मिगी थुहाड़े गै हत्थें सुर्ग प्राप्त होआ ऐ। मिगी क्षमा करो देवी, में तुं'दी म्हानता गी ते तुं'दी दि'ब्ब शक्ति गी पनछानी निं सकेआ। अ'ऊं सच्चें गै बड़ा अग्यानी आं। मोहमाया ते वासना नै मिगी घेरी रक्खे दा हा। क्षमा करो देवी। मिगी क्षमा करो ॥

बैश्नो : असुरेश्वर ! तुगी तेरी गलती दा एहसास होई गेआ ऐ। इस लेई तुगी तेरे सारें पापें थमां मुक्त कीता जंदा ऐ।

महिशासुर : तुसैं मिगी अग्यानता दे नहेरें थमां ग्यान दी रोशनी पासै लेई आंदा ऐ। मेरा तुसैं गी कोटि-कोटि प्रणाम ऐ।

बैश्नो : असुरेश्वर! तेरे मन, मस्तक पर जो अग्यानता दे न्हरे दी परत छाई दी ही; हून ओह परत हटी चुकी दी ऐ।

महिशासुर : हे देवी! तुस कि'नियां महान ओ। कि'नियां दयालू ओ। तुं'दी म्हानता गी नमस्कार ऐ। तुसैं गी मेरा बार-बार प्रणाम ऐ। तुं'दी सदा गै जै होऐ।

सारे : (किट्टे सुरै च) मां बैश्नो दी जै!

(महिशासुर अक्खीं मिट्टी लेंदा ऐ। देवी शीर्बाद देने दी मुद्रा
च खड़ोई जंदी ऐ। घड़ी पर रोशनी बंद होई जंदी ऐ। उसदै
बाद रोशनी पूरे मंच पर फैली जंदी ऐ। सारे कलाकार मंच
पर आई जंदे न।)

जोगी गा करदे न :

जोतां जागदियां दरबार, माता रानी दे दरबार।
म्हाड़ी माता दे दरबार, तैरै झंडा झुल्लै दरबार॥
हत्थ बन्नी संत खड़े दरबार, माता दी करदे जै-जैकार।
जोतां जागदियां दरबार, माता रानी दे दरबार॥

सारे : बोलो जै माता दी। बोलो जै माता दी॥ (सारे जैकारा लांदे न)

(नाटक संपन्न होई जंदा ऐ।)



भेंट

जै जग जननी, जै जग जननी

मनै मुरादां पूरी करनीं
भक्तें दे तूं दुखड़े हरनीं
पूरे जग दी पालनहारी
बेड़ा सारें पार तूं करनीं

कष्टें दी तूं नाशनहारी
गौरी शिव शंकर प्यारी
निराकार ऐ तेरी जोती
चारै कूटां रोशन करनीं

शिव जोगी तेरे गुणगांदे
ब्रह्मा, विष्णु तुगी ध्यांदे
पापिणं गी दंड तूं दिन्नीं
भक्तें दी ऐं राखी करनीं

देवी तेरे रूप नै नेकां
तेरै अगगैं मत्था टेकां
भक्तें पर मैहर ऐ तेरी
शेर सुआरी तूँऐ करनीं

राखशें गी मारी मुकाएं
देव देवतें मान बधाएं
पापी ते पाप मटाइऐ
धरती पर शांति करनीं




इस लेखक दे होर प्रकाशन

1. कुंगले पत्तर खिड़दे फुल्ल : (कवता संग्रैह/डोगरी-1981)
2. पीड़ें दा बादशाह : (कवता संग्रैह/डोगरी-1985)
3. गजलमाला : (गजल संग्रैह/डोगरी-1996)
4. हिरख पटारू : (गजल संग्रैह/डोगरी-2006)
5. गैं-गैं जिंदगी : (गजल संग्रैह/डोगरी-2011)
6. पुंछ-इतेहास दी नजरी च : (इतिहास/डोगरी-2018)
7. जम्मू पादशाही : (इतिहास/डोगरी-2020)
8. दिद्दा : (नाटक/हिंदी-2020)
9. हिरदेगत : (कवता संग्रैह/डोगरी-2020)
10. मां बैश्नो : (पौराणिक नाटक/डोगरी-2021)

मान-सम्मान/आकाशवाणी पुरस्कार

- बहुत बह गया रक्त अब : हिंदी/प्रस्तुतकर्ता-1997
- जीवन यात्रा का चौथा धाम : हिंदी/लेखक-प्रस्तुतकर्ता-1999
- चश्मे-बुलबुल : पहाड़ी/प्रस्तुतकर्ता-2003
- अम्बेडकर फेलोशिप/साहित्य सम्मान : 1997 से 2002
- साहित्यश्री सम्मान : 2021 ई.



टी. आर. मगोत्रा 'सागर'

इस लेखक दे होर प्रकाशन

1. कुंगले पत्तर खिड़दे फुल्ल : (कवता संग्रह / डोगरी - 1981)
2. पीड़ें दा बादशाह : (कवता संग्रह / डोगरी - 1985)
3. गजलमाला : (गजल संग्रह / डोगरी - 1996)
4. हिरख पयारू : (गजल संग्रह / डोगरी - 2006)
5. मैं- मैं जिंदगी : (गजल संग्रह / डोगरी-2011)
6. पुंछ-इतेहास दी नजरी च : (इतिहास / डोगरी - 2018)
7. जम्मू पादशाही : (इतिहास / डोगरी - 2020)
8. दिद्दा : (नाटक / हिंदी - 2020)
9. हिरदेगत : (कवता संग्रह / डोगरी- 2020)
10. मां बैश्नो : (पौराणिक नाटक/डोगरी- 2021)

मान-सम्मान / आकाशवाणी पुरस्कार

बहुत बह गया रक्त अब : हिंदी / प्रस्तुतकर्ता-1-1997
जीवन यात्रा का चौथा धाम : हिंदी / लेखक प्रस्तुतकर्ता - 1999
चश्मे-बुलबुल : पहाड़ी / प्रस्तुतकर्ता - 2003
अम्बेडकर फेलोशिप/साहित्य सम्मान : 1997 से 2002
साहित्य श्री सम्मान : 2021 ई.

प्रकाशक:

मगोत्रा प्रकाशन

करन विहार, अप्पर ठट्ठर (वनतलाव)

जम्मू-पिन : 181123 (जे एंड के)

मोबाईल नं०: 9419105561

मूल्य: 500रु